


剡源集附札記
七





集 源 刻

記 札 附

(七)

撰 元 表 戴

剡源集卷第二十七

古詩五言

大名元復初郎中。攜示感遇五言八章。次韻并簡東平曹子貞編修。薊丘曹克明教授。

美人乘天風。手吹玉參差。我有龍門桐。綴之冰蠶絲。空中一偈答。聞者爲忘機。神馬已出河。鳳皇且鳴岐。悠悠百年內。儻有相逢時。

我登海山巔。羣丘眇如芥。客來談九州。更詰誰小大。神疲穆滿馭。足繭神始載。終然方寸心。擾擾軀殼外。流光如急水。一去難復再。歸來坐虛室。始覺身安泰。老馬寧爲駒。卽且或甘帶。名跡吾不嫌。全生聊遠害。明有不見睫。智有不衛足。學靜三十年。晚始悟無欲。履卑懼名高。居羣忌行獨。不見歌鍾家。白日臥金谷。不見帶索生。行吟扣哀竹。爲君慎燕息。顧免方在腹。

東陽方韶卿惠古意七篇。久不得和。五月二十六日。將假館宗陽橋。稍有閒暇。乃爲次韻。因寄訊彼中吳子善前輩。子善。陳文毅公同父甥孫。

長歲狎紛誼。新廬稍疎靜。虛名亦相累。簪珮來整整。青天戍樓柳。白日仙林杏。散書一長謠。消此清夏永。

二

營營寄巢蜂。白晝爭空花。跋跋緣壁蟲。喧飛亂如麻。譬如惡俗士。便不揮鞭撻。桐君何處來。隔壁聞瓠巴。

三

舊交空中雲。零落跡易消。新交江上流。來去同奔潮。藹藹元英孫。望之十舍遙。願爾多黍稌。相投共簞瓢。

四

人膽小於壺。揣想無限極。及其遂所願。不過一消息。金華文物府。前哲餘楷則。千年萬年名。豈使夸者得。

五

作詩如挽船。學力乃篙櫓。向來牛耳盟。諸老肯多許。元暉雲樹荒。仲宣江海阻。之子歸未歸。相思慰風雨。

六

德孤誰願高。氣寒誰願清。斯文鄒魯來。壇坎勞其生。豈無性命憂。艱難愈同情。如何及門士。亦作胡越聲。

七

永康經濟學。近古將無同。甥孫世其業。汗馬收全功。我欲攬遺跡。雙眸冰鏡空。君亦跨黃鵠。吹簫白雲中。

韓君美經歷賦孟夏木長五詩示僕因寫鄙懷通呈阮使君君美時與諸公講易

吾評陶淵明。略似段干木。詩文雖滿家。不飽妻子腹。仰瞻清風柯。俯窺白雲谷。誰能爲升斗。辛苦受羈束。因君寄高韻。千古動遐矚。

以羔裘如濡洵直且侯韻爲八詩送夾谷子括赴明州推官

鑑虛磨愈明。絃柔調自直。臨民要儒術。非但用三尺。君看春秋學。從士能斷國。人情豈相遠。贈子以不惑。

二

水耕當用牛。陸行當用馬。詩書無近功。平世安可捨。吾州兵荒來。冠蓋多苟且。寧無段干木。意氣能少下。

送袁季源之婺州。因簡范經歷。

爲山不願高。爲水不願深。水深蛟龍集。山高虎豹蹲。我有避人法。終日衣冠林。煌煌錢塘城。游塵書爲陰。豈無青雲交。難在相知心。豈弟袁大夫。寒窗理閒琴。峻坂爲牛力。炎天九秋襟。膠漆四十年。齟齬以至今。天欲饑餓我。使子無黃金。勸仕拙不諧。驅耕弱難任。低回向誰門。後生氣駸駸。今晨積潦霽。鳥鳥有好音。約我共行役。東平步嶽嶽。皎皎婺女精。瀾瀾雙溪潯。臺有白馬生。風梭其蕭森。文林惜妄動。動必向所欽。吾評古毛義。志行近審參。公府許辟召。屈身非祿淫。斯人我知舊。長髯善哦吟。穴蟻夢離合。風花命浮沈。往者納千贄。終然遺一簪。欲行又不得。出門失前禽。子往再拜問。何由振聾喑。

次韻答朱侯招遊海山。

江南春草黃。江北秋雁飛。窮居念還往。故物悉已非。我有青雲交。山林可同歸。十年學撫琴。對客輒累欬。豈不願和悅。調苦心易爲。青天無古今。白日相因依。向來炎炎人。所得一何微。成者化埃塵。不成翻禍機。玉美受雕鐫。馬良遭絆轡。所以曠達士。但貴知我希。請休接輿歌。且急梁鴻噫。名微少士責。身閒免官譏。寧無一日力。相尋盡崎嶇。霜魚碧玉鱸。冰菊食金輝。君歌我按筑。我舞君攬衣。此日爲君歡。醉遊敝船扉。

題陳高士所藏冬青枝上白頭翁畫

飛高得珍叢。青子飢可食。不知何憂愁。二鳥頭亦白。道人天機深。清齋意相許。賴汝不能鳴。一鳴嫌殺汝。以空飛本無迹。韻爲五詩。往扣廣微張公。

智有不近名。賢有不踐迹。百年如飄風。誰作遠行客。所要在持久。以道自消息。吾師豈欺我。白首方學易。浴蠶沙溪水一首。爲上饒陳烈婦作。烈婦信州上饒人。嫁同郡葉氏。年二十五生子四齡而寡。丙子兵寇起。能以智全其家。歲饑發粟賑貧。類大丈夫慷慨知大節。非徒守閨門貞行而已。有司上其事。賜旌表。獨復如法。

浴蠶沙溪水。採桑玉山巔。絲成白棱棱。膠作烈婦絃。烈婦何所言。絃中意纏綿。一說鸞影孤。二訴雛巢穿。巢穿尚可葺。影孤恨終天。有食不自肥。衆禽仰喉咽。真宰憫其疲。勞役盡弛蠲。及今雛長成。雛羣亦踴躍。朝陽照巖林。枯槁生光妍。黃鸝誰謂苦。鐵石誰謂堅。請君屏俗耳。聽我沙溪篇。

書歎七首

王生困縲紲。誅道劉子急徵追。正仲舒叟挈家走。幾遭鞭與笞。東野我無三人辱。閨門但窮飢。飽死世更多。徒憂何以爲。敢作小夫歎。聊爲才士悲。

舒子高品藻。王生怪衣冠。處世那得爾。謊謊真自殘。劉子最多愛。逢人傾肺肝。勸我學其道。縮身可泥蟠。胡爲亦不免。念此坐長歎。

英英天上星。碌碌澗中石。升沈雖不同。精爽或相激。我有知名文。四海邯鄲壁。子昂遭逢不自悶。頗爲談者惜。談者自不知。斯人寧易得。

袁弟豁達人。陳兄靜默士。平生少附麗。頗與同憂喜。邇來怪事發。談笑不可擬。一爲脫淵魚。一爲墜柯蟻。吁嗟其奈何。天運固如此。

數友越州居。無書已三年。台州已無數。逢人每相賢。日夜憶遠友。遠者隔蠻煙。風氣不擇州。俗情輕目前。管鮑死何處。寄酒灑其阡。

結友何用多。管鮑無三人。讀書何用博。得少全其身。君有狗名子。擾擾起風塵。朝逐富兒食。暮聯豪士茵。歸來反如客。魚鳥亦相噴。

蘇州米空熟。越州人不來。緩急託遠婚。不如傍蒿菜。蒿菜在籬落。爲我障浮埃。生女屬他人。生男尙嬰孩。從何得饘粥。作此聊自貽。

觀村中禱雨三首

十里不同雲。五里不同雨。天公白茫茫。乃爾多肺腑。人言蛟龍神。象類可以取。蛇蟲當此時。行路誰敢侮。飛騰信有術。忍待號者苦。咄哉神禹功。浩蕩流萬古。

二

昨日苗穗赤。今朝灑然青。頗知窮旅人。百金換顏形。念爾雖微根。同稟造化靈。自古有枯旱。人類幾千齡。

恐是自生化。難皆問蒼冥。野草人不憐。何獨不凋零。

三

西村送龍歸。東村請龍出。西村雨綿綿。東村猶出日。共稱西人良。或是窮可恤。誰知所雨粟。盡入東村室。儒生無愛憎。但喜蔬醢實。通年一飽廚。猶在兔園帙。

山中翫物雜言十首

二

時露下百草。流螢此飛翻。初如灰燼微。忽作秋星繁。念彼生育處。回光照其根。君莫輕流螢。流螢尙知恩。

三

青橘霜露時。英英秀中園。問訊訊居人。今歲胡不蕃。云有孤兒來。手觸枝上丸。嗚呼此義木。痛感在吾言。野果散高林。雀鼠食之宜。設非人所殘。一顆不敢窺。寧由網罟防。亦無神物司。食道固當爾。雀鼠猶有知。

四

見狗須不走。見蛇須拱手。不走爾非偷。拱手亦相厚。無欺物自信。能勝誰肯負。不見吳山虎。郭文探其口。

五

鳥有反舌者。自古比讒人。時氣一朝遷。此舌竟不伸。衆鳥莫不然。更鳴以存身。如何能言士。聒聒無止辰。

六

犂牛有土德。體厚靜綏綏。豈無牝牡情。不自求其雌。終朝草棧間。若忘渴與飢。嗟彼位兒高。乃爾難自持。

精衛勇填海。鷗旦苦求明。明尙可得求。填海何時成。我觀飛鳴族。一一各有營。但爲口腹謀。遂爾遺其名。

八

燕是孝義鳥。常棲孝義家。堂簷白日暖。上下靜無譁。以此託軀羽。禍福審不差。誰云知數歷。俗士義之夸。

九

圃人憂孽蟲。爲蔬畜雞雛。小雞擇蟲啄。大雞逐啄蔬。蟲去蔬亦盡。對之可歎歔。昂昂高冠幘。反不小雞如。

十

蚯蚓食土壤。蚩蚩何所爲。蜩蟬飲風露。蛻上高高枝。卑者慕其仙。飄飄安可追。倘令智相及。無羨亦無悲。自居剡源。少遇樂歲。辛巳之秋。山田可擬上熟。吾貧庶幾得少安乎。乃和淵明貧士七首。與鄰人歌而樂之。

二

貧賤如故舊。少壯卽相依。中心不敢厭。但覺少光輝。向來乘時士。亦有能奮飛。一朝權勢歇。欲退無所歸。不如行其素。辛苦耐寒飢。人生係天運。何用發深悲。

我居在窮巷。來往無華軒。辛勤衣食物。出此二畝園。薤松鬱朝露。桑柘浮春煙。以茲亂心曲。智計無他妍。

擇勝不在奢。興至發清言。相逢樵牧徒。混混誰愚賢。

三

松風四山來。清宵響瑤琴。聽之不能寐。中有怨歎音。旦起繞其樹。硜硜不計尋。清音可敷席。有酒誰與斟。由來大度士。不受流俗侵。浩歌相倡答。慰此雪霜心。

四

中年涉事熟。欲學唾面婁。逡巡避少年。起穢不敢酬。旁人吁已甚。自喜計慮周。微勞消厚疚。淺辱勝深憂。從知爲下安。處上反無儔。人生各有志。勇懦從所求。

五

古人重畎畝。有祿不待干。德成祿自至。釋耒列王官。不仕亦不貧。本自足饔餐。後世恥躬耕。號乎脫飢寒。我生千禩後。念此愧在顏。爲農倘可飽。何用出柴關。

六

村郊多父老。面垢頭如蓬。我嘗使之言。辭語不待工。古來名節士。敢望彭城龔。有叟諳其後。更恨道不同。鄙哉譏謔者。爲隘不爲通。低頭拜野老。負耒吾願從。

七

去年秋事荒。販糴仰鄰州。健者道路間。什伯成朋儔。今年漸向熟。庶幾民不流。書生自無田。與衆同喜憂。

作詩勞鄰曲。有唱誰與酬。亦無採詩者。此職何可修。

丁氏厚德堂

賤士懷永憂。一物常恐枯。貴者止營私。智或遺妻孥。肉食從古鄙。黃金使人愚。我游四十年。錢塘車馬區。但見插桃李。誰曾種桑榆。白頭識丁子。儀冠儼于予。示我厚德編。嘉名在塘隅。談之爲踴躍。喜氣生眉鬚。願子富倉庾。人人飽餐餽。願子多酒漿。日日開樽壺。行藏自有命。不謁守錢奴。

排律十七韻賀阮侯伯子

芳城春樹晚。清海月弦初。瑞出三神島。光纏五馬車。眼中新鸞鷟。膝下小璠璵。錦襖看爭羨。犀顙畫不如。試啼賓錯愕。獻夢媪勤渠。庭舞張公鶴。門填孔氏魚。一時官府慶。數世甲科儲。聞說衣冠里。高增檠戟間。民隨阮公姓。鄰禁宛溪魚。東去龜浮印。南遊雉遶車。陰移棠蔕蒂。騎擁竹舒舒。政有兒童戀。謠聽父老餘。攢眉詢賦額。正色署刑書。暗室天如鏡。心田老自畬。看騎金腰褭。待弄玉蟾蜍。我欲歌三賈。誰能說兩徐。先隨湯餅祝。聊當賀錢醺。

傍冢東北有山曰紹地。余幸得之。規以爲素莊也。

紹地吾所欣。他時以藏我。岡原見逾美。松柏栽已夥。雙流交在右。一几平連左。憶惜初經營。登高忘蹉跎。年衰已漸怯。步暫石頻坐。居然契券叶。偶爾龜策可。心手之勤勞。軀骸庶安妥。況復近芳茨。時能薦蔬果。雖無劉伶鍤。備慕王孫騶。

謝陳君祥憲使時郡家以余充歲貢陳侯頗憐之令無行

鸞鳳不驚暴珪璧無鋒銛評材容一切未覺世論嚴僕昔江東歸二紀操鉏鎌聞山但廬霍慕水惟沱潛
官車歲千兩未省謁帷幃豈無趙張倫居突不得黔新年有吉語所在興循廉惟此沮洳氓生涯嗇而纖
塵營疲負挈陸取困塗霑赫赫金鋪門風雨今無簷皎皎華裾生塵土今無襜分臺得陳侯笑語脫烹爓
仁賢所居國不言革頑愴侯家仲舉峻何如太丘謙問侯何所爲深坐靜春簾問侯何所學淨兒飄風籤
儼雅菑川公高節齊晉瞻橫流滔天來挺身臥西崦何以贈陳侯孟光書滿奩名曰事言補其辭清以恬
豈但資裨官五經之韜鈴從來名世士必有淵源漸侯識民著龜侯材國梅鹽誠令以德舉遐陬詎能淹
愚者理宜止容僕守窮欄

往時王達蓋嘗與予評陶顏二公云魯公乞米於李大夫者李大夫光弼也而怪淵明所乞食失
其主人名氏以爲恨余按淵明乞食詩云飢來驅我去不知竟何之行行至斯里叩門拙言辭則
是淵明爲飢所驅本不知爲何人家而叩之亦可憐矣然淵明家有五男子傳稱翟氏志趣亦同
能安苦節夫耕於前妻鉏於後又責子詩雍端俱年十三或當別有庶母淵明又嘗助其薪水大
約計之不翅百指之家而當飢餓單身竟行望屋求食不知其家何以爲處乃不如魯公闔門同
飢共飽擇英賢可語者通情焉不亦可乎余家與淵明略相類不敢用淵明法壬辰春有感於故
人之言遂和淵明詩韻將求如李大夫者而告之

今朝胡不樂。取書一哦之。飢窮古不免。陶生良有辭。骨肉同天倫。僮僕緣食來。如何長年中。萬事付酒杯。脫身得一飽。激烈陳歌詩。不如魯公仁。借貸英雄材。嗟余亦有作。欲向誰同貽。

君莫誇少年一首贈俞光遠

君莫誇少年。與我懍者疎。我亦嘗少年。少年君不如。談諧今已忘。猶有少年餘。東南山水國。早得飛長裾。春園虎丘樹。夏檻玉泉魚。吳妍與楚豔。過眼目千車。當此秋風淒。遊子易歎歎。我時未更事。意氣益發舒。出門有佳侶。遇勝不得虛。惟憂日晷短。當去亦躊躇。官曹人所厭。高士不肯居。平生縱觀處。最在客南徐。烟黨四面集。綵衣攤安輿。停觥待淮蟹。醇甘逮僮胥。道路無此願。此願勝鄉閭。自從秣陵歸。鬱鬱不再攄。三間風雨屋。僻其荒林墟。非君好事者。誰能至吾廬。今來建溪上。逢君屢相於。行藏且勿問。人世有乘除。舊狂我已悔。新銳君當祛。男兒不用世。資身在犁鋤。臨風贈君別。勸君惜居諸。勸君重桑梓。勸君重名譽。歲晚未相忘。頻寄山中書。

老樹

老樹老且枯。數柯枝綴之。蟲來食其葉。藤來纏其皮。幸然根本堅。未至甚離披。風霜既無損。雨露猶見私。如何烏鳥輩。同巢自傾危。鬪擊翼似斧。啄傷嘴如錐。樹色歲時減。樹力日夜衰。回頭試一顧。但可相扶持。

伯收東岡麥

伯收東岡麥。仲移西塍秧。四季各有役。餬口走皇皇。豈不惜冠履。兼營業縑紉。憐爾衣食微。及茲筋力強。

古來經術士。什九起耕桑。窮通自天命。謹勿事胥商。

邀陳氏子飯。歸似銅山珎老。丁酉五月十五日也。

飯子山下麥。羹以山上筍。筍堅煩齒牙。麥糲哽喉吻。相邀豈云厚。竟去良不忍。林園隱趣出。魚稻秋事近。短歌訊而翁。贈子以一哂。

飢旱

早風燥我膚。飢火煎我腸。春夏猶自可。入秋始難當。簪珥陡頓盡。衾裯纖細將。奪從女奴手。併入米客囊。但冀喘息延。敢憂生理妨。山州古磽瘠。歲計仰蘇杭。發地流玉粒。浮天駕牙樯。如何水後郡。翻糴浙東糧。行路急促促。人情沸皇皇。焦枯望一雨。禮願將願將願將千方。雲氣亦偃蹇。魃妖轉炎揚。浮生想有屬。沈憂聊暫忘。余居之西偏。有小室。名嗇菴。詩以識之。

嗇語養氣海。嗇食養脾土。嗇慮養心神。嗇勞養筋膂。衰年百事祛。寄息此環堵。危如突圍將。鈍似滯風賈。顛仆冀賒延。空羸待償補。夸虛道蠹賊。逞獲命斤斧。收君齡癡符。佩我養生主。

鄰峰

霜嚴火炬青。月淡兩峰白。堂堂行夜誰。鄰峰販醪客。販醪事且止。歸農收又薄。枝擊習鞭撻。鮮肥憤烹炙。外雖刑憲拘。內實飢困迫。鹿窮有狂奔。虎斃猶恐擲。如何隴上豪。坐作溝中瘠。世無卓魯化。名在跖蹠籍。感難重徊徨。羈危轉驚赤。

春日城南聞禽鳥聲喧甚爲賦二十二韻

今日春氣至。新禽各啁嘲。豈無好脣舌。入耳何恹恹。雖雛最多端。能以巧自殺。黃頭亦翾給。微吭和且調。無計頗滑熟。鳥鵲與鷦鷯。自餘不知名。喧呼雜竿簫。黑衣猥雄點。晝動固非梟。均爲樂其性。幸此風日朝。城南六七曲。荒園繞榛茅。我來感物變。何異在山郊。惟聞黃鸝至。不聞叫交交。當由戀幽谷。畏寒還避囂。羣英蓋壤內。小大一逍遙。得氣不足悅。觸情遂相遼。乘墉少年兒。挾彈欲見邀。所規不滿掬。翻令汗廚庖。鷹鵂勢險薄。爪長尤善梢。同羣自戕擊。此禍極無聊。深藏務遠晦。尙懼形色招。危機布平陸。況乃縱輕標。悲憐復譬釋。當鳴詎爲妖。但懷道傍樹。信美非其巢。

林貴父投老謁銓有贈

天寒道路長。行子難爲客。況復迫衰暮。視近步憧憧。干世悔古學。費時慙惰農。誰知凍雪巷。忽視戟髯翁。袖有排闥書。談如發硎鋒。聽之不能竭。浩氣生奇胸。從來庠序師。專以處龍鐘。才高得教誘。祿休尙遭逢。此職今不少。有求豈難從。去去善自愛。春禽語晴墉。

陳晦父赴銓十三韻

古人取遠士。得一以爲豪。江左貢千百。選掄今始勞。占對混童廝。趨踰偕吏曹。以茲寓繩準。棄髓索皮毛。遂乃考卷業。成文喧誦號。其次嚴保舉。虛櫝相籠叨。富儒坐可得。貧儒走滔滔。有司見其然。厭賤如蓬蒿。誰知真儒者。百黜寧不遭。陳生青紫門。佐書越江皋。秩滿在選中。家寒無所操。虞翻顯憑易。買臣進緣騷。

吳士例則然。且毋銜名高。

次韻答鹽官傅秀才

欲有險於穿。千金身陡沈。爭名急飢渴。對面九關深。誰知海城畔。山水發清音。蟾蜍泄喜慍。簾篠閱晴陰。意到得所指。不作寒鴛吟。斯人定不惡。我輩許同襟。去去復去去。白鷗未遐心。

南巖留宿分韻落字

遊歡值暄秋。飲狎得嘉客。嵌巖復在眼。徘徊忘還郭。款款坐向疲。喧喧笑多謔。低簷近見出。寶乳時聞落。防闌燎蒸新。驚虛搖鼓鐸。僮僮楊露處。僧馴茗頻淪。竟隱諒未能。羨彼高棲雀。

朱使君家諸郎將別十一韻

東南典藩材。朱戶賢第一。天生好兒郎。玉筍森六七。俱能弄文翰。那教踰戶室。伯也秀英英。珊瑚映初日。翁仲最似古。鼎鼎熊彪質。叔季相和鳴。笙入鐘磬出。人言有陰德。我受少權術。公退亦見容。老衰時自失。官期忽在眼。別語常促膝。江湖芥舟小。歲月翎箭疾。善保清明心。臨歧莫輕忱。

掩篋

十客九不解。一解值吾仇。譬如巧蛾眉。同鏡見之差。結交恨不廣。難在相綢繆。掩篋謝年少。所藏非所求。

次和焦治中雲洞紀遊十四韻

是身虛空中。如雲本無有。遊行又其寄。縱樂安得久。嵌巖大硯質。鑱削奇鬼手。棟宇起何年。名稱出誰口。

憶昔扳藤蔓。凌空訝雞狗。疏石生紵。刻刻室懸斗。乘峻開棧梯。綠明掛窗牖。豈無題壁堂。多逢斫畬叟。賢侯章平家。雅韻王謝友。驪珠百四十。模寫已八九。坐我南樓牀。澆我北海酒。人生主客意。如此豈云偶。風花命浮沈。木雁天可否。悠然付一噓。山靈倘回首。

信府同知黃侯名其讀書之室曰廣居

隘夫護藩。得少使有餘。達士心曠然。清明如太虛。海岳陳鼎俎。義駕走軒車。唯諾無不行。尙懷豚與魚。嗟茲山城氓。憎長逮其胥。好語朝索茅。怒攻晝攘裾。侯來未數月。眉頭笑舒舒。退食掃一室。焚香展羣書。舉頭窗楹間。有榜揭廣居。力行守義。鄒公不欺余。

丙午二月十五日。以府檄出宿了巖。

衰年慕棲息。役役殊未休。天明發東郭。日晏泊西州。豈其千金軀。爲此一漁謀。宿麥青已鬱。穉桑黃亦稠。欣然一會意。所愧非吾丘。悔日諒不遠。誓言良未酬。揮手謝還往。伊嚶自伊嚶。

送官歸作

生世悔識字。祝身如野農。勤勞養尊老。膳味日可重。晨芻熟新黍。耕林有過從。行吟蒼松籟。此樂踰歌鐘。

七陽字

雁雁西北來。亦復東南翔。動物各有時。吾當謹行藏。厚口違嚴風。密袂禦凜霜。陶然茅簷下。一篋生春陽。

班溪

我愛班溪班班爲誰好。於時九秋晚。霜葉紅不埒。石搖未歸雲。水映欲衰草。累累牛羊隊。灑灑魚龍道。崇丘尙多菜。殘村幾經潦。故物一若斯。今我胡不老。過從幸相狎。聊坐暢懷抱。

宿福海寺

斷巖蒼龍角。汲流紫雲根。道人絕俗。自然無耳喧。屋脊掛修嶺。一日過千轅。此中但高臥。松風有清言。聽之亦無有。風定松在門。炊成我欲去。獨鶴鳴朝暾。

六月十三日。壽陳子微太博十首。以無官一身輕。有子萬事足。爲韻。

一無字

驕雲散飛雨。隨風爲有無。老農終歲日。望施在須臾。平生官田粟。長此禮義軀。置之且勿戚。一飽任妻孥。

二官字

青青澤中蒲。九夏氣淒寒。翻翻翠碧羽。照影蒼溪間。巢由薄天下。俗士營一官。小大各有適。自全良獨難。

三一字

窮居無公憂。私此長夏日。蚊蠅如俗子。正爾相妬嫉。麾驅非吾任。遁避亦無術。惟當俟其定。靜坐萬慮一。

四身字

流螢出草莽。空飛亂星辰。蜻蜓水蟲質。一變能輕身。物情羨速化。過眼異新陳。嗟嗟白屋士。吾方保吾真。

五輕字

當暑苦炎暘。日□秋風生。窮憂在衣褐。霜路亦可驚。徘徊念年少。歲月去已輕。歲月可奈何。學道恐無成。

六有字

自古皆有隱。陶生隱於酒。炎氛四面集。一窟在北牖。世人羨桃源。桃源復何有。惟容醉鄉徒。百世得相友。

七子字

永日豈無飢。盜粟非所擬。喝行豈無勞。惡木非所止。君家碧梧軒。蓬荷汎芳沚。我來息涼陰。嘉賓薦君子。

八萬字

幽蟲聒午枕。掩抑聲千萬。風前以虛鳴。蟋蟀最多怨。我靜乃得聞。一一來自獻。憧憧道傍子。與爾故相遠。

九事字

炎方有朱鳥。璀璨顏色異。土人目爲鳳。信爾可安致。生雖固當奇。千歲會一至。紛紛鴻燕期。寂寂非我事。

十足字

朝遊剡山巔。暮戲剡山足。英英丹霞洞。不受塵土辱。飛仙復何許。諸子如立鵠。酌君滄浪泉。和君紫芝曲。

陳茂陽書監赴史氏塾

青天碎浮雲。飄落隨長風。當年江海心。聚散豈謂同。我髮春霰白。君顏秋樹紅。各將飛騰具。坐受窮困功。懷書更何罪。暴客歲不容。數夕稍振發。共語涼天中。天明換顏色。囊瓢赴羣童。此事本下策。改道無所從。猶勝古俠士。僧牛市牆東。

春風

春風吹愁端。散漫不可收。不如古溪水。祇望鄉江流。新花紅燦燦。舊花滿山白。昔日金張門。狼藉餘廢宅。回頭語春風。莫向新花叢。我見朱顏人。多金亦成翁。多金不足惜。丹砂亦無益。更種明年花。春風多相識。

八月十五夜雨中微有月色

雨色今夜別。映門白鮮鮮。險知萬古月。自在最高天。天高無陰晴。月亦無虧圓。中間隔雲霧。頃刻變態千。惟當自作樂。上界豈我憐。接竹風撼郭。倒尊水號川。狂歌眺渺莽。恐有浮槎仙。

九日與兒輩遊中溪

悠悠循澗行。磊磊據石坐。林垂短長雲。山綴丹碧顆。蓼花最無數。照水嬌婀娜。何知是節序。風日自清妥。羣童競時新。藕果間蔬蕨。欣然爲之醉。烏帽危不墮。此日山中懷。孟翁不如我。

閨風舒先生客居棠溪袁仲素家見示竹簾詩戲作問答二首

剡竹吾問君。班班爲誰設。一登君子堂。迴與凡界絕。陂龍鱗故鮮。湘娥淚猶熱。既能露文章。匠手安得輟。所憐無可娛。如伴枯禪滅。千金散紅裙。一鏡垂白髮。定非夏侯衣。高堂挂秋月。

其答

何物非可憐。聿向翁戶設。翁好詩更佳。蕭然得三絕。他家少年叢。徒爾歌舞熱。正如閱優場。未久意先輟。翁今一室老。高臥百念滅。湯爐松林風。紙帳梅花雪。時時有佳客。文字送日月。

古詩十五韻送胡天放西遊名儒淳安人

有鐵莫忘鎔。鎔作俠士椎。有帛莫妄縫。縫作山人衣。君看天放翁。氣貌絕清羸。淩落七尺身。仁義充膚肌。無家救人窮。無田恤人飢。江湖三十秋。白頭轉嶮崎。餘情尙灑灑。不吐酸寒辭。事慕古豪傑。諸兒那得知。或云有仙骨。深中愈難窺。蹶騰華佗戲。偃蹇梁鴻噫。世態貴反覆。口語瀾翻飛。夫子顧之笑。百觸不發機。寧常待溝壑。西山古誰悲。佩君珊瑚鈎。酌以玻璃卮。相知豈云無。去去勿復疑。

舟中望紫巖

近山如畫牆。遠山如帶長。我從雲中來。回頭白茫茫。惜去乃爾覺。常時自相忘。相忘豈不佳。遣此春懷傷。飄灑從何來。衣巾徑微涼。初疑雨氣集。冉冉遊塵黃。無歸亦自可。信美非吾鄉。登舟望東雲。猶向帆端翔。次韻答二袁

相逢何草草。不念別日長。別我我在山。別君海茫茫。慰別有難易。我老不易忘。今此春雲篇。來別已悲傷。春雲雖多態。與世無炎涼。朝出山路白。暮歸海天黃。人生不免別。與君非異鄉。我詩不如雲。春雲解飛翔。感物二首

驥驥今失羣。亦自矜趨騰。俛仰歲時久。帖然困蚊蠅。豪鯨逸其穴。天水成滄溟。豈無魚鼈交。望望爲所憎。物理有翕張。達人同廢興。幸無怵迫憂。聊復曲吾肱。

其二

魚目出泥沙。空村百金珍。豫章值擁轅。細細供蒸薪。論材何必多。適用卽能神。託交何必深。寡求永相親。鮑叔拙繻魯。張生窮厄陳。茫然扳援際。豈意出風塵。

八月十六張園翫月得一字

明河盪殘雲。清海收晚日。婆娑林端月。爲我良久出。洗杯問勞苦。天女笑胼胝。月行虛空中。萬古無損失。且可娛今宵。勿復思昨日。歌情天水遙。坐影入樹密。噴醒有微酒。微詩或呼筆。仲容歡入林。懷祖嬌在膝。初猶整裘褐。久乃忘冠櫛。趨鏘翻弈盤。笑傲驚帳室。寧來共喧呶。不許私暇逸。蚩蚩復擾擾。醉態不可一。情知此月下。此樂世無匹。月光本天性。清瑩本其實。動定極淳涵。聲沈轉蕭瑟。忽忙寄醉語。悟遲已難述。

送鄉友林耕道往信州因寄李明通余與林李皆遊故中書盧公威仲之門

盧公全盛時。桃李何紛紛。冠蓋蔽白日。談笑起青雲。林翁我鄉曲。同業又同門。如何三十年。白頭始相聞。全家作楚鬼。隻影窮江源。起手問曲折。口澀不肯言。寧非衣食牽。猶賴齒頰存。歎此皆有數。吾書已云云。下盡浮世塵。上通先天根。事來卽順受。不得勞悲欣。我老耕破硯。百錢混人羣。聽之如飲醇。油油至微醺。所恨各有役。東帆復西轅。平生李元禮。歸爲致寒暄。

鹿頂山朝暉軒爲東玉師賦

金雞警神開。燭龍轉嚴車。陰蒙欲銷散。巖谷開噓呀。急然蒼蘿顛。湧出紅蓮華。天暉初照爍。六合無藏遮。而找靈臺中。善根始萌芽。珍重慎消息。外物如塵沙。

鄰友陳養直請賦山心樓樓乃入剡舊寓也

諸峯何盤盤。四起如帷牆。試問客主誰。茲樓山中央。面勢既環合。結構欲飛翔。我來名山心。一笑借胡牀。左手南風矧。右手北斗漿。山靈亦我笑。夜夢車兩廂。一坐三十秋。林篁鬱相望。花鳥天語默。煙雲野行藏。開通勿障礙。百世敢遺忘。

刈園詩爲竺秀才作越靈義人

朝從園中去。暮從園中歸。園中何所有。雜草青離離。刈少猶未覺。刈多還漸稀。豈憂筐筥頻。要使牛羊肥。但放刈手緩。勿傷蘭與葵。葵高葉難護。蘭弱根易萎。惟彼惡草種。刈盡轉蕃滋。此理不可詰。此語令人思。送陳養晦赴松陽校官

書生不用世。什九隱儒官。抱璞豈不佳。居貧良獨難。陳子剡中秀。盛年早彈冠。嘗搴丹丘雲。亦窺滄海瀾。仙真願喜笑。魚龍從盤桓。天風一吹激。卻步赤松關。諒子太宇定。悠然置悲歡。但令懷居輩。極目勞追扳。秋蟲歎

夏蟲聲漸微。秋蟲聲漸繁。微物何所知。時至不得閒。嗟我鏡中髮。亦復就凋殘。淒然難憂患。霜風掃茅菅。反不如彼蟲。自得草莽間。所以達生士。逃名在空山。客居雖云樂。不如早知還。

剡源集卷之二十八

古詩七言

聽琴行贈沈秀才

君不見江南琴師海與聰。誰與傳者夢溪公。又不見醉翁詩中沈夫子。聽水作琴琴譜起。祇今人間何處無琴師。問渠端由渠未知。錢塘東風萬人裏。沈家還見奇男兒。沈家家住鴛湖曲。夜理漁絲朝采菊。菊苦難餐魚又寒。彈出歌聲寄淒獨。近來攜琴東海行。清音應滑如流鶯。湖園日煖百花笑。彈徹滿樹春風生。我不識琴識琴理。爲君悲酸爲君喜。相逢正值酒錢空。佯狂攘臂紅塵市。琵琶阮咸休羨渠。相知豈須頻曳裾。醉毛死久髻徐去。洗手空山脩樂書。

赤泥嶺行

種桑三年寒得衣。養犢作牛堪挽犂。生男祇解戀鄉土。五日溪船催父歸。行前倉庚後杜宇。去家漸近聞剡語。恨身不作田舍兒。騎竹搏沙遶牆戶。人生衣飯取裁足。阿奴碌碌猶類福。獻書覓舉真下策。年少奔馳頭已白。君不見燕山萬里客更難。赤泥嶺上春風寒。

建溪精舍得本字

四山脩脩風日煖。白髮看花惜春晚。當時衰草牧羊坡。今日池臺紅霧滿。最憐幽篁手所植。兒戲成業亦千本。舊遊聚散萬事拙。客夢悲歡百年短。荒涼處處經戰馬。寒食家家澆祭怨。險知地下不識醉。祇合生前尋酒伴。蒼苔白石堪枕藉。野鳥清溪自絃管。同遊飄揚正捷步。老我摧頽甘負眼。風牀溽暑新候濁。江樹飛雲故人遠。出城少事幸縱恣。賭令爭歡君莫懶。

夜寒行

昨日天寒不成醉。今日天寒不成寐。醉遲得酒可強歡。寐少愁多頻發喟。紫竿葦炬鬧荒城。役夫遙作鶴鳴鳴。擁衾高枕未云苦。熟聽但覺令人驚。烏孫黃鵠飛不返。遼城白骨填未滿。朔風蕭蕭吹戍旗。居人何如去人遠。丈夫無成霜滿須。沙場萬里星河疎。南牆詩翁窮據爐。北窗少年猶讀書。

騎馬行答贈吳中張子潛鄉貢

君不見天上續絃膠。又不見海外切玉刀。傍人錯愕心自快。痕迹過眼無秋毫。吳江先生淮海客。長篇大章歌落托。白袍只作東土音。黑頭曾射南宮策。霜清水落芙蓉開。酒酣獨上吳王臺。緘書右望寄飛鳥。乘風忽擬穿蓬萊。人生相逢不在早。賈生太少顏生老。興來亦欲向西遊。約君騎馬闔門道。

自信上歸遊石門訪故人毛儀卿鎮卿兄弟作長句贈之

丙午冬

山開未開白雲梯。人行不行青麥溪。五年清夢隔蟻穴。千里飛塵深馬蹄。重來交遊亦笑樂。但覺几杖煩提攜。門閒霜葉無數積。風定水禽時一啼。藥草春暄夜更長。木蘭花下聽天雞。

昨日行

種樹莫種垂楊枝。結交莫結輕薄兒。楊枝不耐秋風吹。薄交易結還易離。君不見昨日書來兩相憶。今日相逢不相識。不如楊柳猶可久。一度春風一回首。

招子昂飲歌

與君相逢難草草。與君相逢苦不早。人生何處少泥塗。此日飄零武林道。武林城中馬如雲。閉屋狂歌人不聞。狂歌自笑君亦笑。依然狂絕不如君。君歌豈是真狂者。青衫少日春瀟灑。至今俊筆五花紋。最惜青眸十步下。虛名何用等灰塵。不如世上蓬蒿人。黃金偏趨不貧室。白髮難老無愁身。風雨無情亦如此。淒淒但聒窮人耳。不見朱樓高到天。鳳簫龍管連朝起。連朝笙管可奈何。我歌且止須君歌。青天白雪望不極。坐見綠水生層波。我生胡爲被狂惱。江頭魚肥新酒好。從今作樂拌醉倒。與君相逢難草草。

雁南飛

雁南飛。飛且鳴。我不愛爾絕漠排雲之健翼。愛爾秋來意氣各有適。江湖萬里同風聲。風聲萬里秋蕭索。山鄉田荒水鄉薄。不應專爲稻粱來。得飽且住今亦樂。羣飛嘹唳奈爾何。青天茫茫無網羅。誰知世有苦心者。夜半聞聲悲轉多。雁南飛。勸爾飛時莫近征婦舍。手觸邊衣添淚下。更莫飛近貧士屋。絃絕樽空怨悽獨。雁南飛。飛且止。世事驚人例如此。我昔扁舟五湖水。年年見爾秋風裏。如今未斷少年情。一度雁來心一驚。今年雁來明年去。明年去去江南路。欲將書寄去邊人。明年認作書回處。

剡氏飢

剡氏飢。山前山後尋蕨其。斷其得粉不滿掬。皮膚皴裂十指禿。皮皴指禿不敢辭。阿翁三日不供糜。不如拋家去作挽船士。卻得家人請官米。

俞光遠父子歸馬輿兼託問訊故舊

君不見深山野馬生龍駒。又不見荒林老鷹鳩作雛。男兒似種世所少。俞郎三世成清儒。祇今道路滿塵土。大袖已覺妨奔趨。提攜逐食何足羨。羨子有策寧親軀。蠲符畫行雞犬靜。餐錢下歲鮭魚須。機神有餘自靜重。蔚蔚老氣生眉鬚。高堂百客森冠裾。四座指點眞明珠。誰能對此心不動。歸來轉覺羣兒愚。峽南雲深山氣冷。今歲亦聞愁早枯。但憐四壁愈憔悴。傍人解笑吾人迂。書來隔宿發夢寐。便買舴艋隨僮奴。山籬語喧聽櫛栗。晚閣棋罷懸蜘蛛。暫違相見喜定劇。勝似朝夕趨庭隅。因子此去傳區區。先從賢翁到吾徒。劉郎壠絕今更壠。香巖老人安穩無。

採藤行

君不見四明山下寒無糧。九月糧麥五月嘗。一春辛苦無別業。日日採藤行遠岡。山深無虎行不畏。老少分山若相避。忽然遇藤隨意斫。手觸藤花落如蛸。藤多力困一顰伸。對面聞聲不見人。日昃將來各休息。妻兒懶拂竈中塵。須臾叩門來海賈。大藤換糧論斛數。小藤輸市亦值錢。糴得官粳甜勝乳。明朝滿意作晨炊。飽飯入山須晚歸。南村種麥空早熟。逐日扃門忍飢哭。

杖錫虎

杖錫山中深。與世絕往還。從來稱是仙聖窟。虎暴不得奸其間。今年山神大失職。虎來山前搏人食。傳聞此義我亦怪。歷問更爲居者惜。杖錫山中民。猶健疎農耕。老稚爲樵壯爲獵。朝朝暮暮山中行。山獐野雉收當糧。天寒果熟霜狸香。腰弓度壠矢插房。黃茅覆溪機半張。鳥啼犬奔風箭急。機鳴未發且前立。平生聞虎不識面。顛倒窮途忽相及。驚呼頓迅聲漸微。妻兒駭呀不卽歸。循蹤走至設機處。但有血漬爛斑衣。嗚呼哀哉乎。此民良足悲。嗚呼嗟哉乎。此事不足疑。吾聞以毒殃物者。物亦以毒殃其身。我不敢以爾爲仁。以餌鈎物者。物亦鈎爾以爲餌。我不敢以爾爲智。杖錫山。山絕深。無虎不必古。有虎不必今。天生此物居山林。有虎無虎視爾心。但令爾心無干戈。虎居深山奈爾何。

少年行贈袁養直

我昔如君初冠時。見君垂角兒童嬉。君今長大一如我。但少頭上斑斑絲。誦書如流日千紙。更出清言洗紈綺。明珠在側翼自失。挾冊茫洋吾老矣。人言四十當著書。春風半負黃公壚。僮奴哂笑妻子罵。一字不給飢寒軀。儒學無成農已惰。履窮始悔知無奈。人生少年還易過。請君奴力無如我。

義蜂行

山翁愛蜂如愛花。山蜂營蜜如營家。蜂營蜜成蜂自食。翁亦藉蜜裨生涯。每當山蜂採花出。翁爲守關司微遮。朝朝暮暮與蜂狎。頗識蜂羣分等差。一蜂最大正中處。千百以次分來衙。叢屯雜聚本無算。勢若有

制不敢譁。東園春晴草木媚。漫天蔽野飛橫斜。須臾駢翼致雋永。戢戢不翅輸牛車。似聞蜜成有所獻。儻類不得先摩牙。重防覆衛自嚴密。雖有毒螫何由加。一朝大蜂出不戒。春容靚飾脩且姱。蜻蜒忽來伺其息。搏擊少墜遭蝦蟇。羣蜂倉皇迷所適。謁走欲死聲呀呀。求之不得久乃定。復結一聚猶如麻。我來訪翁親目睹。搏髀不覺長咨嗟。翁言蜂種幸蕃盛。衆以義聚猶堪嘉。烏衣槐安傳自古。蠻觸分據兩角蝸。雖云彷彿存國族。徒以紀異其辭夸。博勞舅婦恨翼短。繁靈異姓爭荒遐。豈如茲蜂互推舉。一體同氣無疵瑕。我憐翁言私誚責。扶傷蚤愧隋侯蛇。況伊二毒俱下類。瑣細不足勞鞭撻。前尤往悔俱勿論。事會倚仗來尙賒。新房才成蜂未壯。舊房委棄墜泥沙。

雪後況湖歌 爲阮使君作

君不見明州城中日月湖。縈藍繚白如畫圖。良時樂遊古亦有。何人破雪浮官廚。金貌暖壓紅氍毹。紫貂醉拂青珊瑚。塵尾高懸前唾壺。使君霜髯雙臉朱。同時僚客總豪秀。陸池閬苑羅仙儒。名談鋒湊初不惡。安得玉人歌縷珠。似聞州民喜公出。終日繞岸狂驢呼。淫絃濁管何足道。入耳得此成真娛。城尖數峰大模糊。山郭何路通樵蘇。年年臘前得三白。樂歲仍然多餓夫。定知新年稍安樂。風流使君江左無。

山茗行

茗花如雲色如雪。萬壑千溪看不絕。風吹日炙自鮮明。棄在空雲誰愛悅。遭逢偶入山人手。縛作蓬鬆掃塵帚。髣髴髮落已蕭然。時對西風一回首。人間貴賤不須論。此物古來從至尊。猶勝長拋霜露裏。秋蟲野

憐愁枯根。

啄木行贈淨珥上人

東園嘖嘖還剝剝。有鳥晨飢啄霜木。天寒蟲豸得幾何。爪背披猖良爲腹。華堂蝙蝠添毛衣。飛蚊淨盡何處歸。海山野鶴亦有飢。飢絕不向人前飛。

坐隱辭

坐隱。字出顏黃門家訓。而其義非也。余雖移家棠奧。居猶未定。每往城南寓舍。城中無所營。交遊益疎。或至堅坐踰旬不出。遂取二字榜其室。而作坐隱辭以儆之。

快馬疾馳不如徒步。多金善賈不如躬耕。日食八珍不如強飯。封侯萬里不如還鄉。我觀古來丈夫子。何用桑弧蓬矢射四方。蘇秦生爲六印役。主父死願五鼎烹。不如諸葛草間談管樂。陶潛醉裏傲羲皇。南面之尊何如於據梧之賤。環轍之智無預於荷蓀之狂。高岡峻谷久亦變。青天白日晝夜行茫茫。胡爲憂愁浪自苦。百年齒髮誰得長。堅強不如揜關埽跡成坐隱。清齋永日一爐香。

賦意未暢復拾前韻之餘者作廣坐隱辭

我作坐隱辭。客來問我坐隱方。開門進客還復坐。爲客歷落言其詳。隱朝市。我不能衝塵冒暑走遑遑。隱江湖。我不能披蓑戴笠操舟航。隱山林。山林白晝行虎狼。隱田里。田里赤立無資糧。窮觀六合內。投隱幾無鄉。是以古來人。失路多猖狂。或隱伶官。俠客。或隱藥肆。僧房。或爲君平隱賣卜。或稱陶朱隱行商。雖能

逃世網。於事未爲良。況我難攜一身隱。二親白髮垂高堂。神仙拔宅古亦有。無翼不得高飛颺。不然少自屈。歸去隱耕桑。隨傭竭作既無一夫力。買田築室又乏千金裝。僮奴挪揄親友棄。往往人厄非天殃。悲來俯仰尋隱處。欲親書冊依杯觴。引酒未一酌。狂風鬱律衝肝腸。讀書未一卷。噫嗚感慨淚浪浪。酒能觸人生憤激。書能覽古知興亡。非徒不足充隱具。反緣二物來自戕。覆杯掩卷且默坐。氣定始覺如平常。因思世上百千事。是非榮辱俱可忘。楊朱墨翟悲泣兩無益。伯夷叔齊浪死埋首陽。不如隨緣委運祇塊坐。冥心徑往遊黃唐。不論辨。不憂彈射相摧傷。不還往。不憂風露沾衣裳。人生衣食分已定。登途役役空自忙。不見啄木鳥。終朝一飽如不償。不見守菴龜。窮年引息泥中藏。目前伸屈君莫問。此鳥孰與龜年長。坐歎自笑客亦歎。烟口暗室生天光。

行婦怨次李編校韻 丙子台州作

赤城巖邑今窮邊。路傍死者相枕眠。惟餘婦女收不殺。馬上娉婷多少年。蓬頭垢面誰氏子。於聲獨哭哀聞天。傳聞門閥甚輝赫。誰家避匿山南巔。蒼黃失身遭惡辱。鳥畜羊糜驅入燕。平居鄰牆不識面。豈料萬里從征鞭。酸風吹蒿白日短。天地闊遠誰當憐。君不見居延塞下明妃曲。惆悵令人三過讀。又不見蔡邕十八胡笳詞。慚貌千年有餘貳。倫生何必婦人身。男兒無成同碌碌。

飛花行贈馬衢州時馬在建奧別業

山上風花山下飛。花飛欲盡山翁歸。歸來亦自忘行跡。但覺滿地紅依依。餘花更惜隨春去。溪上遊人山

下路。戀家漁父斷來踪。難老劉郎記前度。花開花落春風前。我昔與翁同少年。祇今鶴去但華表。何處鳥啼悲杜鵑。遊人自遊春自暮。從翁問花花不語。且當向花日日醉。醉倒花前學花舞。

織錦迴文苻堅時秦州刺史竇滔妻蘇蕙若蘭爲其夫徙流沙作

君不見秦州城中雙帶花。春風吹散著流沙。流沙千縈復萬轉。織入綵機歌不斷。歌不斷可奈何。人生富貴憂患多。不如窮山饁田婦。白頭不識遷移苦。

石湖范至能嘗作姑惡詞以爲婦怨非天下之爲婦者所願聞故作續姑惡詞以廣之

姑惡姑不惡。人言姑惡人豈知。爲姑作婦百不辭。婦在姑尚可。婦死姑方悲。恐傷姑意不敢違。化作異物鳴無時。姑不惡姑不惡。怨姑還當被姑責。但願生身復作婦。死別不如生見樂。

余博士家貓相乳歌

上饒余宗鐘鼎家。孫枝十世猶清華。南昌博士最賢者。膝下囀囀開緋牙。我行其庭值供頓。食指半千聲不譁。女悅男聲況脩謹。冠立童趨知等差。江南族聚盛亦有。如此禮法嘻可嘉。長公公退忽語我。瑞貓之篇題滿車。二雌同時各生子。一雌病僵如臥瓜。一雌端來代其乳。顧睨懇惻呼嚶啞。子衆身疲乳亦竭。病母起將新乳加。天寒繡褥更枕藉。日暖花磚羣戲拏。我憐二貓有至性。欲脫毛尾升笄珈。北平將門梁肉窟。此事尙得昌黎誇。公家儒化鬱積久。義感宜可馴豚猓。願公盡力持閭範。彌補始終無闕瑕。不見古來歌舞地。祇餘猿鶴與蟲沙。

贈天台潘山人號秋崖

老潘雙眸如紺珠。帶以秋陽朝露之清腴。山形水態出沒千百變。經君指顧不得藏錙銖。我昔少年好狂走。風餐雨沐逐逐忘朝晡。至今臥遊想共處。但覺雲濤煙瘴千里行須臾。匡廬春風鍾阜雲。彭浪之磯大小飛來孤。秦淮震澤洞庭野。峩眉縹緲南樓五嶺東蒼梧。歸來把鉏剡山下。有時一竿釣月賀家湖。龍鷹擺馬困羈束。每逢風鳴草驚動號呼。聞君談診到骨髓。褰衣振迅恨不六翮生形軀。尋牛卜龍古所有。君家祖孫三葉傳青烏。人言河流可移山。可鑿秦皇漢武已類愚。公愚相留徘徊山南山北一百里勝處。忽然開酒壺。問渠劉伶一童一鐻欲何用。且可從我日日醉倒黃公壚。

范文正公黃素小楷昌黎伯夷頌蓋宋皇祐三年十一月在青社所書以遺京西轉運使蘇公舜元者也。後二百四十年大興李侯戲得此本。於燕及南來守吳。乃文正公鄉里。卽訪公子孫以畀之。范氏喜而索詩爲贈。

有耳不聽下里巴。人有手不寫劇秦美新。天生靈物寄我體。可惜穢棄同埃塵。清風百世希文老。一字流傳今是寶。誰知堂堂伯夷頌。曾借春暉發枯槁。韓子也復英雄姿。冰寒斗峻餘文辭。吹噓自起北海隱。膾炙聊慰西山飢。天荒地老精靈在。處處江湖紅散彩。昔離孔氏忽自歸。今遇龔侯如有待。世情愛古兼愛奇。書奴滿眼非吾師。請君焚香盥手拜此帖。歸洗人間兒女癡。

送程敬叔教諭赴建平

爾之王父東諸侯。朱門行馬高修修。嚴君家學又繼美。年少鄉書推上游。我生苦晚百無益。猶及步趨陳太丘。飄零不死見三世。爾復預此能言流。風神清羸談炙穀。生理蕭條書汗牛。今年別我忽遠役。天馬放靶難停留。問渠何官縣博士。橫山之西江東阪。此邦固是吳楚會。風淳土朴衣冠稠。亦聞巖谷多古跡。最喜道途稀使騶。公堂講罷看山坐。香鼎茶鐙相勸酬。熱官千騎豈不好。白日公庭愁督郵。飲冰茹蘗善自愛。歲晚相期釣滄洲。

題陳貴白畬齋

海山作農農較苦。累級開畬燒宿莽。畬成得粟不償勞。歲晚空瓶誤飢鼠。不如陳郎腹果然。日日閉門耕紙田。餘糧尙許餉遠客。植來時和南風篇。

余旣題畬齋有聞紙田之說而笑者復作長篇

學農無年尤可待。學儒無成祇益餒。羨君終歲作書癡。聚室瞽瞍窮不悔。客來問計何所出。一飽自懸饕粥外。平生據案畎畝心。汗簡爲犁筆爲耒。藁芽百氏草避耨。膏澤羣經泉赴澮。日高洛誦烏鳥悅。夜半吳吟風雨會。世間梁穀何足道。開卷穰穰心欲醉。旅熏辟蠹防雀鼠。更繕巾箱築倉廩。古言樂歲生禮義。先見儒門消鄙悖。租符且免里正索。子本時容書客僧。東隣有田多牛翁。日執牙籌親細碎。困糧竟作誰腹飽。騎吏驚惶汗流背。此時畬齋談無事。巍冠正與周孔對。禮義適口卽爲味。牛心菊苗皆可膾。我詩君意兩自知。且勿譏譏語兒輩。

剡箋送任叔實

剡溪春水碧鱗鱗。剡水野藤如亂雲。剡人伐藤就溪洗。匠出素箋黃土紋。大箋敷腴便竿牘。小箋輕盈日千束。我昔少年貪著纂。累笥連箱輸不足。年來棄置百事休。引腕就書如畏囚。有時得箋不自愛。杜曲蠻歌相獻酬。世人貴賤隨人好。西家棄物東家寶。退筆成山何足道。爲我攻修太園草。

次韻和郭祐之雙桔堂趙母壽詩

嚴親不待高官秩。一刻歡娛勝千日。趙郎宦薄母八旬。自採芳甘充俎實。堂前酣酣雙桔紅。童兒見客笑滿容。有田得耕我亦去。繡衣御史語生風。

醉歌贈袁茂才

君休咕囁語。我欲顛狂歌。君語雖工不可多。我歌顛狂如我何。君不見蘇季子。腰橫六印車如水。奇禍一朝生口齒。又不見朱買臣。朱綬煌煌不庇身。不如會稽暗啞人。南山山頭北山下。亦有騎牛唱歌者。行人不訶官不問。歌罷牛歸臥牛舍。我歌屬君君爲歌。桃花醉面春風和。君歌不成春亦老。虛客江城車馬道。明日酒醒應絕倒。剡源溪上看芳草。

題范道士來鶴亭

仙客已騎黃鶴去。道人自愛白鷗閒。白鷗萬里猶可狎。黃鶴已去何由還。借君剛風七龍轡。返此靈物三神山。天空海闊望不極。回首正落樊籠間。

題李伯時畫五馬圖

嗚呼良馬不世出。今人但尋李侯筆。五龍忽墮白雲鄉。海角孤臣看自失。太平天子開明堂。前驅麒麟後鸞鳳。當時此馬來萬里。想見顧盼生風霜。龍眼老仙亦如此。揮毫談笑羣公裏。官閒祿飽少塵埃。霧閣雲窗天上起。風流轉眼餘山河。人間荊棘何其多。臨風卷圖三太息。此馬今存知奈何。

孫使君飛蓬亭

江南澤國多煙水。年少輕身作遊子。適來衰懶畏奔馳。忽見飛蓬平地起。飛蓬主人人中仙。曾乘千斛凌風船。船頭畫鼓催行酒。船尾紅粧歌采蓮。收篙卷綸今尙樂。卻悔從前風浪惡。青雲裘褐一鷗身。白髮山林五湖客。我來花霧紅霏霏。此蓬如山何處飛。但當共坐索酩酊。溪塘過雨春魚肥。君不見鷗夷名成滄海去。富貴畏人如脫兔。又不見羊裘釣客桐江上。一出張皇動星象。何如飛蓬主人亭上飲。醒與客論酣卽寢。寢酣忽作江湖夢。風雨漂搖蓬不動。

題峴山圖

山頭種石懸蒼雲。山下急流風卷紋。何年荒碑當嶺立。龜趺圭首猶鱗皴。神龍驅毫鬼輸墨。羊公精神荆楚色。想當意匠經營初。已盡東南煙霧迹。從來登覽非眞遊。襄人正樂吳人愁。尊前鄒湛亦不惡。江山千古同悠悠。君不見征南後來人。姓杜。自喜作碑心更苦。祇留陳迹笑癡迷。行客何曾淚如雨。

看花曲

種花郎君愛花好。看花兒女笑花老。牆東花開鬧喧喧。馬蹄蹴碎牆西草。遊人賤草只看花。明日重來還可嗟。但見萋迷青覆地。千紅萬紫成泥沙。君不聞明妃當年辭漢宮。黃雲塞下白楊風。一朝邊亭靜烽火。詔書自議麒麟功。又不聞馬嵬山前玉環血。歲歲春風吹不滅。詞人正賞涪溪碑。千秋妖恨無人說。紅顏誤人何足憐。花開花謝春風前。猶勝淒涼後庭樹。離歌未斷江南暮。

東門行二首

時鄞城火第宅遭燬故有此作

春風顛狂卷地起。吹動江城寒劫灰。江城千家丹碧窟。過眼不復餘樓臺。九轉燭龍竟爲爾。六尺海鷗安在哉。平原無人金谷散。惆悵東門歸去來。

其二

松枝可餐不可久。蕨其可春難入手。書生身業值無年。翰墨千困不充口。煙洲何客釣寒魚。江郭誰門倚殘柳。琴臺歌管無處尋。惆悵東風幾回首。

江行雜書

荒城日暮秋江長。穠樾野熟秋風香。青天茫茫不知處。扁舟臥入菰蒲鄉。波深浪靜魚鴨樂。遙林墮影同飛揚。平生見畫無此本。便欲默寫懸高堂。須臾雷雨漲深墨。漁戶悉閉收牛羊。篙人軟語似憐我。拗蓬蓋頭編蒿牀。此時殘怒尙什七。瀟灑幸爲清蚊蟲。無人靜覺物性出。蚯蚓草蟲歌晚涼。銅山乳竇青最遠。羞縮不似來時糝。但餘田鳥如匹練。雙雙飛點暗煙黃。山川一日幾變態。人事百年安可常。停舟起問魚酒

戶。此地幾年成戰場。虹梁羽化新起廢。白骨無數埋前岡。惆悵令人百憂起。飲客正酣歌發狂。坐中悲樂誰竟是。歸來玉兔搖滄浪。

吳姬曲五首

吳姬來。吳船蕩漾湖花開。隔堤迎笑欲飛舉。不用少年多漿催。問君青春得幾許。看取架上紅玫瑰。

其二

吳姬歌。歌聲宛宛歌情多。當尊一闋且呼酒。酒遍餘聲無奈何。春風顛狂亦如我。坐見花外搖湖波。

其三

吳姬舞。朝看成雲暮看雨。偶然欲笑一回眸。錦段金錢落如土。誰家學取野鴛鴦。終日癡迷弄沙浦。

其四

吳姬醉。濃花爛蕊春憔悴。當筵賭令諱空拳。忘卻拈三并數四。坐中癡客儘偷看。翠蹕雲翹歛不墜。

其五

吳姬歸。湖光燭影紅輝輝。中心有語不敢吐。安得作月生汝衣。明朝花下更須醉。放取後園鶯燕飛。

達觀亭歌爲建康徐氏作

天風颯爽巖曦開。雲溪縈環芳樹來。林棲鳥處眼未識。何人擇勝誅荒萊。仙跡着人清辟易。徐郎襟懷趙郎筆。經營須通山鬼意。開鑿曾煩祖龍力。高亭一區尤絕塵。滄浪捧足芙蓉雲。憑危醉歌敞花氣。九衢塵

土何紛紛。客來問名。名達觀。對此心情轉蕭散。想見千秋爭戰場。只把雲霞眼中換。浮名絆人茲可憐。飛鵲落日釣窗前。何時真脫塵纓去。我自網魚君刺船。

春愁曲次劉正仲韻

山翁隱居雁蒼谷。春樹年年爲翁綠。耕休坐樹作勞歌。山光水影相徵逐。歌成無人祇自娛。行人頗怪歌聲殊。循蹤歷歷見井舍。恐是避秦來此居。花煙溟濛亂晴雨。山前倉庚後杜宇。客來不喜亦不驚。但道寒暄無俗語。山中今歲是何年。黃旗徵樹裝樓船。淺村已盡到深谷。逢人未說先淒然。憂來宛轉歌不已。我樹非材端後死。劉號繆園五陵當日翁如雲。如今何處悲風起。山南老農亦不憂。機淺不爲妻子謀。日高飯飽牛背坐。日晚放牛溪上游。人生逐名被名誤。十年車馬長安路。長安路絕雲霧昏。歸來棄筆尋農具。舊遊年少難與隨。夢境一笑難重追。惟有剡源窮掌固。相思望斷西天垂。

正仲復有倒和春愁曲之作。依次奉荅。

漸老之日來垂垂。已去之日不可追。傷春畏老兩作惡。世事嘗與愁人隨。忽得君家遣愁具。行歌日日春溪路。不知愁緒逐詩來。更惜芳顏彼春誤。王孫草暗誰重遊。曲江痛哭窮參謀。燕騎琵琶渭城酒。居人不覺行人愁。行人欲歸痿思起。白髮逢春心未死。水流花落無處尋。燕去鴻來何日已。溪村此日更蕭然。強笑爲君呼酒船。黃雞喚日不待曉。蟠桃一熟三千年。草間管樂真浪語。烏雀應門蓬柱宇。祇餘平世猷畝心。夜半吳吟泣風雨。高人與虎能同居。壯士斷蛇應不殊。年高漸欲置憂患。每賴君語相調娛。昔日劉郎

悲放逐。看花惆悵春無綠。何如今日春愁曲。爛醉佯狂白雲谷。

題趙子昂畫馬

趙子奇才似天馬。頃刻飛龍生筆下。畫成撫卷復長歌。坐客喧喧不停寫。蹄勢經鞭秋跌蕩。鬃毛出跣風瀟灑。似嫌文繡減天真。盡脫鞍韉轡輕把。青袍洗足巧眉睫。馱坐奚官亦閑雅。我來一見驚欲拜。曾識鸞和趨廟社。千金朽骨古猶惜。況此難分毛色假。瑤池路斷伯樂盡。日暮嘶鳴氣暗啞。爲君昂首一慰意。猶勝無逢老巖野。

南山下行

南山高。北山高。行人山下聞叫號。旁山死者何姓氏。纍纍骸骨橫林皋。鳥喧犬噪沙草白。酸風十里吹腥臊。中有一人稱甲族。蔽膝尙著長孺袍。不知嬰觸爲何罪。但惜貴賤同所遭。妻求抱尸諸子哭。冤氣滅沒埋蓬蒿。人言投身由貨寶。山村豈得皆權豪。一言不調兵在頸。性命轉眼輕鴻毛。龍爭虎鬪尙未決。六合一穽何所逃。振衣坐石望太白。寒林夜籟聲溔溔。

相逢行贈文伯純同年

昔日相逢面如雪。今日相逢面如鐵。人生年少得幾時。動作風塵十年別。十年別久未爲惡。頻見亦無年少樂。寒棲夜雨金瑣夢。故園春風白袍客。雕鞍駿馬紛紛來。西城亂花春漸開。與君追逐覺老醜。一笑且醉高陽杯。相逢得醉今日好。醉眼相思還易老。只圖留君日日醉。醉裏忘卻江南道。

壽陳貴白

祝君以陸地千蹄牛。君言不如扁舟江海狎浮鷗。祝君以通侯尺二組。君言不如草屋三間臥風雨。富貴何人不解頤。君視二物如兒嬉。我今贈君亦無物。但有顰牙佞屈村田詩。我歌詩。君進酒。客主譁譁起相壽。尋常此日費千金。京洛奔馳今白首。江風颯颯吹黃塵。對面樓臺不見人。與君漂泊爲何事。一笑幸是山林身。寡語薄味足以養氣。少求簡出足以養體。奇章鍾乳木斧斤。胡廣菊潭堪唾涕。君不見南方最鳳五色龜。窮年引息不嫌飢。又不見曲轅擁腫百圍木。匠石捐棄反爲福。蝸封蟻壤何足論。歸來未廢蓬蒿園。我更撻詩君釀酒。通家德公有賢婦。

春溪惡寄孫常川孫有約不至

春溪惡。日日春風吹過客。千車萬轍不相嫌。一客歌來吹倒卻。旁人借問客爲誰。咸淳朝士今布衣。聲名欲隱人自知。君不聞孫興公。逃亂走入黎州峯。子孫百世居峯下。往往翰墨餘仙風。鶉衣藿食何足恥。頭白河清吾亦俟。向來南面五馬車。只飲西山一盂水。青牛處處迷行蹤。白鶴歸來餘故宮。道逢樵客知去遠。遲君不來三日晚。溪水猶能作吳語。似續君家遂初賦。

碧桃花歌爲王丞作丞名子兼字達善丙子家燬於火瓦礫中自產此桃

君不見孔家藏書屋。屋壞猶聞起絲竹。又不見鄭家註書老。書帶後來垂作草。如今王家萬卷文字林。桃花一樹春沈沈。花成不勞主人種。花落更同山客吟。從來春花重萼不綴實。此花可玩實可食。我擬天公

出奇物來壽主人并餉客。春前待花花下狂。春後待實林下嘗。定知此桃不作尋常草木味。祇作舊時文字香。王夫子多釀酒。春風亭館何處無。天錫名花祇翁有。從翁乞醉三萬日。仍令醉後花從筆間出。

王丞分惠碧桃樹再賦奉謝

木星之精天上遊。春風歲歲蒼龍頭。偶然根葉著下土。散作人間百花樹。莫疑君家此花無種生。定是天上蒼龍精。白玉之趺青玉簇。開花既奇成又速。三年方駭大如林。五年已見高踰屋。我來吟作書林花。煙塵萬捲重抽芽。君家原有孝義種。自來青州丞相家。爲君出芝草。芝草那能千日好。爲君結琥珀。琥珀恐爲貪者獲。不如花混在春花叢。歲歲與君同春風。春風同賞復同吟。願與主人同好心。更令此花分作千百本。處處種成君子林。

贈趙子實

北風吹沙溪倒飛。白日未落山中歸。千邀萬覓不相就。誰信有人穿翠微。幅巾大帶長襦袍。韋篋錦囊鮮綵毫。名門發身合燕頤。一經傳家眞鳳毛。坐車侯嬴吾不讓。白社寒林氣清放。驂麟翳鶴誰不能。要職神光牛背上。逢萊山。丹霞谷。天仙留書三萬軸。聞君暫去還復來。許君細和滄浪曲。

積雨小霽喜袁太初舒叔恭兩生至

春山日日寒風雨。一日天晴花欲舞。林暄洞屋散罍煙。水活溪巖落冰乳。嗟余鬱鬱無所適。方對青山一開戶。蒼袍紫帽兩少年。健足齊扳氣如虎。名區入眼疑未快。忽肯捫蘿到茲土。霜蔬處處稀尙摘。臘酒家

家寒未煮。相看氣味太村野。自喜談諧少城府。舒郎十八白眉長。四海龍門有明父。袁郎皎潔巧步趨。出語珠圓吾所許。人言風骨須晚秀。早慧譚譚天謾與。吾評此論殊未公。峻詆曾經孔文舉。歌成高軒已年倍。賦解鳴蟬容客覩。吾山雖窮有靈跡。雪瀑丹崖相媚嫵。留君待作大雷吟。莫學癡兒生吳語。

謝李仲賓墨竹

君不見李侯筆端如渭川。頃刻匹紙生琅玕。霜柯雪幹鐵石色。忽作小山煙雨寒。問君何從得此本。湖州嫌濃眉州軟。風軒月檻一相逢。妙處不與人意遠。人言學畫先學影。此君風骨青雲並。林深有路鳥聲真。日高無人山氣靜。平生見此我不疎。逢侯得畫兩有餘。從今洗眼空山底。更讀人間瀟灑書。

題王敬仲野亭宣城

王家野亭蒼翠邊。秋山萬疊相鉤連。披衣曉霽伴雲坐。散髮夜涼須月眠。主人清豪亦好客。常有車蓋來翩翩。門閒無煩鶴通謁。酒散有時風掃筵。問君生涯幾何許。笑指沙漠滄洲煙。朱門千礎局嬋娟。豪絃急管爭喧妍。何曾一日能免俗。稍來對談心爽然。古人去遠吾不識。今日汨沒難爲賢。長公高談少公和。魯山伯鸞相後先。名成但恐累隱趣。莫遣妙語人間傳。

贈彈琴衡山蕭道士

寂寂歷歷不足聽。聽久亦復難爲情。名噴勢忿大如屋。袖手對此須臾平。一拊再拊。園鶴舞。三四拊之。淒風生。天寒歲晚行路遠。湘水日夜東南傾。

登新嶺

華華礧礧白石溪。綿綿茫茫青草磯。四山陰雪溼灰色。六月杜鵑深樹啼。田廬經漂有高下。麻豆滿塢無東西。隔巖飛流送人語。對面喧風吹馬蹄。祇今莫辭柳栗杖。與子更上巔岈梯。登高意遠會有極。回首煙海令人迷。

送葉伯幾赴奉化錄杭州作

君不見東海殫龍子。學飛便逐風雲起。又不見西域豪馬駒。墮地一日能馳驅。葉家翁季亦如此。一經接武成師儒。毛錐如風腹如笥。快書疾讀三千字。頗聞曾下仲舉榻。不爲頻通禰衡刺。臺書翩翩江上來。吾州自古多賢才。裏琴攜硯速相就。爲子歸壩山中萊。

歲晚次韻答李在明

墨鄉守墨不作惡。歲晚左就辛鄉公。何人吾伊驚夜半。大雪北窗歌國風。

仇山圖 爲仇仁近作

仇山山下仇山人。白頭官學走風塵。問渠家在山何處。雲氣漫漫不知路。詩人作事例多癡。逢山且畫且題詩。不如鄰翁不識詩與畫。一生耕釣仇山下。

剡源集卷第二十九

律詩五首

三次韻寄戴祖禹

同分剡溪派。自喜小王書。野服調驍馬。濃香薰蠹魚。歲時趨闕里。早晚上公車。與我真兄弟。風流但不如。

茗溪

六月茗溪路。人看似若耶。漁簪掛棕樹。酒舫出荷花。碧水千塍共。青山一道斜。人間無限事。不厭是桑麻。

道桐川欲訪梅。右司不知其處。
故總幹潘伯可從大挽詞二首

落落知難久。堂堂竟不還。江湖官七品。風雨屋三間。已矣烏頭白。嘻乎豹管斑。兒曹莫輕脫。英爽在空山。得死何須哭。偷生正可疑。倉皇歸印日。慷慨卻金時。規矩諸郎有。襟懷我輩知。平生郭有道。消得蔡公碑。

和鄧善之秋興二首

鬢髮日夜老。神仙那可求。揚雄識字苦。園晏著書愁。碧酒紅蓮夜。朱絃白雁秋。論心得少暇。同上最高樓。

鶴化城猶在。龍移井未枯。百年吾道半。六合此身孤。西嶺栽花屋。東風賣酒壚。伴狂覓耆舊。處處土音殊。
渡長柳。投小蒸邵教授宿。

清曉浮雙槳。黃昏值一飧。風鳴長柳浪。雲揜小蒸村。饑極知鱸美。驚還覺雁喧。同袍恩有愛。燈火細溫存。
客遊

客遊吳楚地。最好是秋天。三柳團臍蟹。雙溪縮頂鱸。桂林雲頂寺。廬湯月中船。酒醒□□雁。猶勝聽杜鵑。
自宣州至湖州風雪中十日始達

江湖老未休。十日走三州。南雪馬沒耳。北風船打頭。窮猶攜筆硯。寒欲貫衣裘。漸喜家鄉近。兒童浙語稠。
十二月二十三日華亭小泊華亭近方通潮

一一歌遊處。今年又寂寥。雞聲生塢樹。蜃氣雜江湖。斑白尋遺老。丹青詫麗譙。衰懷緣子女。不憚往來遨。
次韻答應德茂雪後遠寄

山中不來久。何處度殘年。人悶如中酒。村荒似禁煙。將茶冰箸煮。移枕雪蓬眠。更肯狂歌否。春風雙玉船。
贈上饒道雲仲

江上青雲客。天邊白馬生。百年文物似。一席笑談傾。問舊能枚舉。論財比莽輕。徘徊亦自好。可使濯塵纓。
送鄉同舍黃君賞謁陳提學

六館賦聲在。五陵遊伴稀。如何趨仕版。猶自着儒衣。春晚鶯羞語。城寒花慢飛。江湖陳仲舉。相見肯空歸。

六月朔日再會再次韻與胡氏謙避暑

臺屋深難暑。湖林近易風。高歌送長日。醉眼睨涼空。雀舌纖纖碧。雞頭淡淡紅。行藏數子別。談笑一樽同。

次韻蔚上人見寄

流落誰相憶。山林蔚講師。園機魂夢接。詩力鬢毛知。舟去須尋處。書來不記時。君看東海月。今夜亦追隨。

道衡書寄求詩

烈士蹈東海。公仍歸白雲。龍藏誰顧蛻。鶴去不隨羣。道貌青難寫。香風遠自聞。人間塵垢子。羞讀徑山文。

次韻蔚講師新春之贈

每見輒自失。春風雙鬢斑。詩囊貧裏富。藥市鬧中閒。梵路通湖寺。敝樓當郡山。清緣事事足。聽此屢開顏。

史昭甫招陳宗魯之長興

之子滄浪去。三吳西更西。白鹽葍菜膾。紅酒稻花鷄。地少驚雲滿。天空見日低。錦囊看爛漫。佳客醉留題。

風雨行湖山村

風雨湖山暮。屠村又鮑村。鳥巡漁退艇。犬認獵歸門。天作蠻雲暗。溪憑剡漲喧。十年燈火伴。草次共魚飧。

詠蠶

物亦有仁者。蠶功不可量。將身甘鼎鑊。與世作衣裳。過棧蒼雲濕。登山白雪香。未知龍種似。猶與馬羣妨。

柏坑

西去疑無路。誰知是剡津。行多收柏客。住有掘苓人。寺隱山前古。村經水後貧。時時百里外。來此祭田神。

證道寺

彎環青徑斜。自是野僧家。滿澗瀉巖液。插天排石牙。爐寒餘柏子。架靜落藤花。記得逃兵日。門多貴客車。

喜王丞病較

途窮已難忍。那許病經時。學到自無鬼。命強容有醫。飯爲扶壽本。書是解煩資。便作天台約。山行未覺衰。

丁亥歲除前二日書事

索索寒搜客。沈沈雨洗年。殘林生獵迹。歸鳥避饕煙。節物杯漿外。溪山鬢影前。行藏都未定。筆硯底能捐。

寄雪竇何長老嘗許畫蘭不至

高高山頂寺。更有最高人。定起松鳴屋。吟圓月上身。雲藏三伏熱。水散百溪津。曾乞蘭花供。無書又過春。

鄞城火後見光遠

火後丘墟市。兵前風雨春。那知攜手地。俱是皺眉人。海柳吟猶弱。山鶯聽未真。明朝各分路。何處避風塵。

客言劉樗翁事

俗薄名難盛。人窮迹易危。從來天下士。不計里中兒。隱玉看虹氣。堅松任蠹枝。相知不相識。況又不相知。

蔣堯仁監簿挽詩二首

家廠宣和後。官名德祐前。不圖諸老盡。竟得一身全。月旦懸虛鑒。巾箱有秘篇。堂堂何可得。誰乞畫圖傳。

照席鬢眉古。傾筵咳唾清。緋魚前進士。刀筆老儒生。政熟元無譜。書高別有評。百年茲士少。諸彥自偏名。

四十

四十不解事。真成無用人。交遊青草盡。途路白雲新。漸覺名妨靜。難將學濟貧。堂堂楚喪傳。猶有隱流噴。

夜坐

愁鬢丁年白。寒燈丙夜青。不眠驚戍鼓。久客厭郵鈴。洶洶城噴海。疎疎屋滿星。十年窮父子。相守慰飄零。

晦亭

東海窮詩客。西風古驛亭。髮從殘歲白。山入故鄉青。世事徒三窟。兒童且一經。丁寧速賒酒。棗栗試沙瓶。

孫常州挽詩

白髮何人在。青山此老歸。殉攜貧日硯。斂着賜餘衣。文物鷗興滅。園林鶴是非。諸公莫惆悵。英爽世間稀。

嚴提舉挽詩

判得身煨燼。歌銘尙爾爲。可憐蟬脫蛻。還許豹留皮。剡水歸來棹。柯山看斷碁。平生觸心處。臨卷費相思。

澤雨溪漲抵郭可畏

黑雨連三白。黃流迸一川。盡漫騎馬路。祇有釣魚船。城郭功如此。江湖興豈然。兒曹卻輕捷。來往似飛鳶。

夷齊

夷齊棄封國。虞芮讓閒田。如何後世士。尺寸事爭喧。鄰居有愧恥。況復兄弟間。揜卷三歎息。古風何時還。

贈針醫范秀才

不但針經熟，言談語語真。
鍊形如鐵佛，信手合銅人。
祕攝魚千里，空飛鶴當輪。
功成倘相挾，平地脫風塵。
遊登袋寺寺，出茶筍甚佳。
獨無杜鵑。

其二

路絕猶人跡，山空惟水聲。
如何芳樹裏，不著杜鵑鳴。
筍市層層出，苗田寸寸耕。
縑流太清朴，亭榭不標名。
偶得巾幘問，老匠云正古。
漣酒巾也。

漣酒陶元亮，名傳尚有巾。
方成執鞭志，更著捧心人。
待菊須簪髮，臨流擬祓塵。
乃翁真處士，吾黨祇閒民。
又作散愁。

說窮人不信，欲說更何爲。
日永書腸覺，霜濃病骨知。
□家兵潰後，交絕廩空時。
頭白風塵境，消磨尙有詩。
太學冬至日，同齋朋友先。
以兄弟敘拜訖，遍詣諸齋。
行禮出，遂置酒湖上。衣冠談笑之樂，至今栩栩在念間也。因至日去近二十九和爲正仲道之。

晝閣東爐早，黃簾曉燭遲。
名南僮僕滿，齒拜弟兄疑。
歌酒神仙舫，衣冠宰相碑。
如今窮海上，逆旅話襟期。
舊里火後多有築宅者，太平客戶也。

人說離鄉賤，歸鄉更莫論。
許詢家莫幹，杜甫客東屯。
廢井微蹤出，新鄰雜語喧。
平生江海意，歲晚白榆村。

食淡

世亂謀生拙。村深食淡能。沙蔬羹白煮。山稻飯紅蒸。暑跛方傳友。寒糴共學僧。庖廚尙如此。未歎室生冰。

寄謝王侍御

雲氣蓬萊閣。霜威獬豸冠。耽書眞柱下。執法更臺端。步驟三台近。聲名七郡寒。誰知階級禮。許爲腐儒寬。

久客且歸留別郭于昭憲掾

久客令人厭。初春乍許寒。飛蓬妨覽鏡。脫粟愧加餐。坐有誇羊酪。門誰住馬鞍。重來會相見。老性忍悲歡。

趙壽父遊杭

東浙飢難住。西湖遠不多。好辭松葉麪。來聽竹枝歌。水屋花千繞。巖林錦一窠。秋深道途好。老子亦婆娑。

鄰友疫

歲惡災妖熾。人窮性命輕。如何赤髮鬼。亦及白眉生。忍楚嘗親藥。停哀寫子旌。鄉鄰拘俗忌。哭弔並無聲。

老態

老態誰能脫。中年子自如。丹胎三轉候。卦氣一周時。倦動身如客。平眠力勝醫。看書亦漸懶。怠到或成詩。

頓寒懷單祥卿教諭時新開酒禁

霜花一夜白。風葉滿村黃。欲出歲華老。相思江水長。留枝遮鵲戶。存蜜補蜂糧。想見山行處。開窗新酒香。

蘇伯清席中領張仲賓所寄二詩兼聞陳無逸已從湘南官滿歸養喜而有答仍次來韻

我愛張公子。清言氣不低。湖溝隨市轉。亭樹與城齊。杯酒方花下。扁舟又水西。祇愁騎馬滑。難惜錦障泥。

次韻蘇教授立春書事

病老空山客。寒紆積雪春。麥苗青有主。桃板粉成神。短策陶元亮。輕舟賀季真。征徭幸不及。游眺雜閒民。

讀閩風題林隱詩追和贈汪秀才

山林一跡地。塵土二毛年。避世書爲屋。謀生藥當田。卉衣從俗製。蔬供學僧煎。渺渺滄溟去。今誰魯仲連。

送謝教諭

聞說龍泉縣。儒風最可人。墨池千澗縮。石室四山鄰。北學中連刻。南音漸帶閩。峩冠作賓客。罄折不須頻。

蝗來

不曉蒼蒼者。生渠意若何。移蹤青穗盡。眩眼黑花多。害慘陰機賊。殃踰蠱毒蛾。秋霖幸痛快。一捲向滄波。

丁丑歲初歸鄞城

城郭三年別。風霜兩鬢新。窮多違意事。拙作背時人。雁蹟沙場信。龍腥瀚海塵。獨歌心未已。筆硯且相親。

夜坐示友

夜久燈花落。淒聲生遠林。有懷嫌會淺。無事又秋深。黃葉歸田夢。白頭行路吟。山中亦可樂。不似此同襟。

宿永固寺

小寺如山艇。坐來風雨宵。榻分櫻樹影。饌帶菊花苗。親近談難褻。狐馴聽不妖。許由渾欠達。嫌到野中瓢。

孫太監挽詩餘姚人

禹穴收雲氣。滄江亦斷流。眞成掃地盡。同作上天遊。銘誄看遺史。衣冠入隱丘。空餘平世眼。尊望李膺舟。

其二

穆祖收英俊。斯人晚更成。白頭眞老監。褐服舊諸生。仕國餘波遠。儒鄉巨棟傾。蒼蒼無處問。西望累吞聲。

風雨遊小大浦

海塢秋風裏。無惊眼亦開。潮衝烏嶼長。雨過象山來。畚父收牛種。漁丁拾區胎。乘桴吾豈敢。人說近蓬萊。

方處士挽詩二首

不謂高名下。終全玉雪身。交猶及前輩。吾不似今人。別號行鳴雁。遺編感獲麟。斂儀應自定。只著古衣巾。

其二

不比他人死。何詩可挽君。淵明元嬾仕。東野別攻文。滄海諸公淚。青山處士墳。相看莫浪哭。私諡有前聞。

宿趙嵒丞家

溪山兵後縣。風雪旅中人。迫夜愁嚴鼓。衝寒託軟巾。摧藏名字在。疏率饌穀眞。今代徐元直。高風自可親。

社日城南山作

社日年年雨。江花處處春。漸成垂白老。不見踏青人。榆柳邊聲雜。龍蛇歲事新。端來近城郭。猶自厭風塵。

趙君理約同途不至

待子不來久。煙山看樹青。爲吟天外句。更立水邊亭。雨暖催科斗。雲深長茯苓。鄰居亦有約。休待鬢星星。送雙溪汪和仲往象山見周使君兄弟

五馬天邊外。雙鳬海上翁。白頭眞避地。黃卷舊趨風。歲月搜詩味。山林把酒同。漂零誰得去。羨子逐飛鴻。聞應德茂先。離棠溪有作

落日蘆花雨。行人穀樹村。青山時問路。紅葉自知門。苜蓿窮詩味。芭蕉醉墨痕。端知棄城市。經席許頻溫。交秋不雨

淞水飛成雨。焦田灌作秋。江湖雙趺底。伏臘兩肩頭。餓蠹知何罪。蛟龍自不憂。吳兒有高廩。正蕩采菱舟。曉行

漸漸路可識。紛紛山轉多。數雞啼遠塢。一鳥起滄波。藤杖溼雲石。筇鞋濃露莎。何人尙高臥。層構着煙蘿。同諸子行上甌山

白石秋更潔。清溪寒自鳴。牛羊爭道路。鳥雀聚柴荆。野果高低熟。山田早晚耕。吾歸任衰懶。兒輩託平生。晚投韓采巖

冬日寒難暝。巖溪淺易冰。猿飛紅果嶂。人度白雲層。望屋多依竹。逢樵半采藤。艱難吾甚厭。何處學孫登。下郝長塘小憩示陳養晦

野水通田白。村山貼縣青。兵荒猶古道。暑暍且長亭。稻地晴耕犢。瓜田晝撲螢。吾詩不寂寞。細諷與君聽。

此地

又說風塵起人來似水流。飢窮餘此地。嘯聚是何州。野白荒荒闊。雲橫莽莽浮。相逢問田父。未可賣耕牛。

送徐生仁榮侍親遊山

蚤識梁松拜。居成潘岳游。一年歸雁雨。四月落花秋。溪味涼供酒。山聲晝入舟。歸來佇新語。莫但作吳謳。

簡王元剛併寄意王理得君玉

見說頻相憶。新年已兩書。雪肥秦望草。春動鏡湖魚。繭紙堆成屋。烏蓬走當車。諸公有遊事。少待意何如。

紫溪邱義翁挽詩

先君老友友。最是後凋人。開館日千屨。藏書山四鄰。門迎新印綬。壙掩古衣巾。會哭皆英俊。哀風暗海塵。

題陳秀才溪山佳趣

城郭尋尋盡。溪山宛宛來。同誰遷蠟屐。爲子破蒼苔。書欲爛斑設。花須爛漫栽。趙郎題墨妙。煙霧眼中開。

東離湖州泊南潯

張帆出東郭。沽酒問南潯。畫屋蘆花淨。紅橋柳樹深。魚艘寒滿巷。橘市晝成林。吾道真迂闊。浮家尙越吟。

次韻荅寄閩風舒先生

聞說薌巖老。風情不減前。菊盤秋熟蟹。竹枕晚涼蟬。碑碣僧頻謁。詩囊客自編。梅花紫溪路。一別又三年。

送陳養晦教諭之象山

聞說橫經處。潭潭坐翠微。開窗見日出。拂席有雲飛。藥市山山古。魚餐水水肥。新篇應爛漫。依遣遞筒稀。

趙孟樞脩職挽詩

辦得從容死。知渠磊落人。風雲數世澤。玉雪百年身。譜牒圖經舊。園林墓道新。不知滄海上。更費幾沾巾。

送羅學正赴歙

文公湯沐邑。子去作儒官。馬首千峰秀。鶯聲二月寒。山禽攢俸納。溪友借書看。近日科名闊。青雲上不難。

杜子問赴建康南軒祠長

祠前花木可愛

一席清溪上。深衣雪鬢翁。揮犀談孔氏。釋菜禮宣公。堂饌淮鮮白。賓筵楚醴紅。花臺無恙否。回首幾春風。

己亥歲歸過泉口紫芝山傷謹講師

行路夢猶在。入門人已非。山青古佛頂。雲墨祖師衣。賭弈曾同拙。看真似欠肥。百年誰免此。只合早忘機。

三山鄭君挽詩

近日經師少。人中又哭君。遺編空白屋。同列盡青雲。塵土千金產。湖山數尺墳。紛紛梁肉種。誰得致斯文。

送穹上人還里

但得扁舟便。春風處處行。定中三竺月。禪外五□□。海角雕胡飯。山畦玉版羹。清緣倘相就。談笑解塵纓。

褚叔豪赴山陰和靖祠長

此老真迂闊。白頭方出山。一燈河洛後。千礎剡湖間。講鼓驚雲動。書船載月閒。可無容席地。容我了躋攀。

逢翁舜咨

相逢渾不覺。祇似宛陵貧。鼻鼻花驕客。瀟瀟雨淨春。借書消茗困。索句寫梅真。此去青雲上。知君有幾人。

舟過嚴州

溪石茸茸出。冰泉滢滢懸。銜盃仙洞頂。挂席客星邊。古岸魚爲市。窮鄉繭當田。生涯著處有。奔走愧華顛。

招王奕世

聞說銅山下。書屏四面開。就僧煮紫筍。共客席青苔。鐵畫年俱長。霜根頂未栽。何當端午暇。一別剡鄉來。

再招奕世

雷晚還多雨。山寒只似春。野榴開向客。籬笋長過人。一寸書看懶。三叉路走頻。王郎肯來否。談笑共南鄰。

山中

野水晴猶漲。春雷晚始鳴。地閒無堠邏。山遠有蠶耕。身世通寒暑。交遊半死生。方知一杯酒。眞勝百年名。

七月初五夜養正堂示諸友

客裏猶多事。秋來又一句。青天星斗淨。白露稻梁新。留落空存節。炎涼莫問人。儒堂得佳伴。吟諷勸比鄰。

袁提幹挽詩二首

短世誰無死。深山獨有歸。送車晴起霧。埋碣夜生輝。晦朔鷄鳴在。江山鶴夢非。剛言仁者壽。近事例多違。

其二

我昔攜家走。君曾埽榻招。亂離心易感。生死義難消。雅魄歸泉壤。潛光出市朝。平生五字苦。寒淚灑山瓢。
單漕貢君範挽詩

竟抱遺經死。斯人亦可哀。傳家一夔足。涉世萬牛回。白屋身空脫。青山手自開。樵蘇且莫近。玉樹爛泉臺。
久客鹿頂承張景山寄詩次韻奉答

但得無拘束。身輕處處仙。清談煨芋夜。陳夢種花年。水竇羊腸折。山籬麕眼編。詩來正清絕。松下忽聞鶡。
梅山

梅尉功成後。安知不此來。路逢耕者問。山是化人開。樵隴低通海。茶村暖待雷。談園亦可隱。不用壑蒿萊。

律詩 七言

乙亥歲毘陵道中清明

百年只有百清明。狼狽今年又避兵。煙火誰家寒食禁。簪裾那復麗人行。禾麻地廢生邊氣。草木春寒起戰聲。渺渺飛鴉天斷處。古來還是闔廬城。

丙子除夜

富貴如今似駭機。漂流未遣壯心違。鄉鄰有酒貧能醉。村落無醫病亦稀。客任低頭從狗竇。妻休掩面對牛衣。十年涉世渾如此。除卻躬耕事事非。

杭城風雨中簡子昂

五月錢塘風雨秋。懷人頻倚面山樓。雲收樹色遙成海。水學江聲暗入溝。一斗盡輸無事飲。千金不買辟寒裘。自憐寂寞無園學。車馬門前過似流。

東湖第三溪上皆史氏故第

日晏霜濃十二月。林疎石瘦第三溪。雲沙有徑縈寒燒。松屋無人鳴畫雞。幾聚衣冠塊作土。當年歌舞醉如泥。早知涉世真成夢。不棄山田春雨犁。

史亨父挽詩

王食嬋娟非壽資。清懷猶勝幾男兒。壺觴竹寺尋秋月。燈火荷齋聽雨時。補衲有衣曾禮佛。吞丹無訣莫憑醫。平生瀟灑王文學。地下相逢且說詩。

吳允文參議同登金陵鳳皇臺醉作

百年訪古此徘徊。更上山椒掃草萊。一樹地腴胡馬瞰。數圍天險化龍開。時間營籍傳謠曲。誰見禪宮離劫灰。李白不生王謝歇。西風日落鳳皇臺。

越城待旦

策策虛樓竹隔明。悲來輾轉向誰傾。天寒胡雁出萬里。月落越雞啼四更。爲底朱顏成老色。看人青史上新名。清溪白石村村有。五尺烏髀託此生。

林村寒食

出門楊柳碧依依。木筆花開客未歸。市遠無錫供熟食。村深有紵試生衣。寒沙犬逐遊鞍吠。落日鴉銜祭肉飛。聞說舊時春賽罷。家家鼓笛醉成圍。

寄天台舒閬風先生

初丙子同避兵台之硤石

嶺雲盡處是台州。有箇詩翁住下頭。不寄一書春又晚。相思百里水空流。新蹤凍合鶯雛谷。舊夢花迷燕子樓。聞說道旁烽燧急。定應重作峽中遊。

火後

當年歌酒留連處。火後來看一惘然。傍水幾家初飲馬。入春三月未聞鶻。炎涼世事殘城樹。歌哭人聲去客船。不是危腸拌醉得。顛狂無處着詩篇。

過應浩然先生墓

人間萬卷厖眉老。眼見堂堂入草萊。行客須當下馬過。故交誰復裹雞來。山花不語如聽講。溪水無情自薦哀。猶勝黃金買碑碣。百年名字已煙埃。

劉正仲至寶山不值主人而去次韻奉寄

日日松間過□□。詩成忽在水雲西。何人夜榻愁聽雨。無數春船倒上溪。燕筍出時斑豹美。鳳花開處杜鵑啼。東歸更踏來時路。醉筆山牆取次題。

遊陽明一洞天呈王理得諸君

禹穴蒼茫不可探。人傳靈笈鎖煙嵐。初晴鶴點青邊嶂。欲雨龍移黑處潭。北斗齋壇天寂寂。東風仙洞草氍毹。堪憐尹叟非關吏。猶向江南逐老聃。

送旨上人西湖并寄鄧善之

聞說西湖也自憐。君遊更傍早春天。六橋水煖初楊柳。三竺山深未杜鵑。舊壁草生尋舊刻。新巖茶熟試新泉。城中新友須相覓。西蜀遺儒解草園。

辛卯除夜

臘月今年只今夕。春風明日是明年。狂歌把酒屠蘇地。醉眼看梅霧淞天。碧玉千壺喧坐次。紅牙六博闌飛錢。頭顱雪白心情在。聽說承平一惘然。

拜袁越公墓因遊定水寺有懷源老

乃翁已作飛仙去。猶得潭潭好墓田。老樹背風深拓地。野雲依海細分天。青蜂曉接鳴鍾寺。玉井秋澄試茗泉。我與源公舊相識。遺言瀟灑有人傳。

陪阮使君遊玉几

花滿車茵酒滿船。亂雲堆裏訪枯禪。林深何處無芳草。人靜有時聞杜鵑。神屋畫飛青磴磴。靈潭陰罩赤蛇涎。居然悟得松風夢。回首廬山二十年。

雪竇飛雪亭和孫使君

匡廬亦有千尋瀑。無此陵虛翠玉臺。身倚老松天上立。眼看飛鳥雪中來。山神禁肅難投唾。木落魂消得浣埃。見說下巖堪對望。道人臨壑翦蒿萊。

邑中滯雨示陳貴白

猶及相逢鬢未華。故鄉春盡不須嗟。園林處處生新草。風雨年年送落花。高樹晝寒歸有鳥。小溪湍急走如蛇。方知傲世不在隱。高枕北窗閒打衙。

十月朔旦寄貴白兄弟

黃牛村前秋葉飛。青螺峰外海雲歸。故人相思雪滿鬢。客子獨行風舉衣。烏鵲定占誰屋喜。鱸魚知比去年肥。當時歌酒江湖上。百里音書今亦稀。

次韻任起潛謀隱之作

江邊秋日逢任子。大醉索詩吾欲狂。爲問山資何次第。祇餘丹訣轉淒涼。黃金范蠡曾辭祿。白首虞翻未信方。千古浮雲共歸意。曉風城郭水花香。

晚秋遊中溪四首戊子

淡竹岡前沙雁飛。小花尖下柘丸肥。山雲不見雨自薄。天氣欲寒人正歸。招伴祇須新稻酒。臨風猶有舊苔磯。風流鬢髮莖莖在。怪石老松今是非。

其二

經秋溪水碧洄洄。無數曉山如鏡臺。紅葉流從龍輿出。白雲飛向石門來。亦逢紙戶曾相識。尚有樵蹤且莫回。端爲何人作風物。漫山漫谷野花開。

其三

休折山中松桂枝。溪魚亦小莫垂絲。沙田翻白收秔後。霜樹著紅嘗柿時。日落牛羊歸徑熟。天寒鳥鳥向人慈。出雲數里成官路。問事如何總不知。

其四

樹淡雲濃又一坡。招邀處處是行窩。梯巖危似蟻緣木。架屋高如鵲結窠。水味野栽茭白瘦。山毛人摘芋紅多。行年四十不稱意。更欲客遊知奈何。

春夜喜陳汝晦見過

乃翁治獄多陰德。之子論文有古風。尊俎祇容吾黨共。衣冠能得幾家同。書林有業何妨隱。徭籍無名莫怨窮。百歲相期今夕意。賴君咳唾起諸童。

鄉君子肯堂董君分教貴溪作詩奉寄

舟車赤日千餘里。筆硯清風二百年。開口人知宗洛派。舉頭身欲近閩天。絺袍涼擁松皮几。桂酒春浮藥玉船。猶有英髦臥空谷。閒將名字訪華顛。

次韻荅陳叔高

蚤種青蒲已滿溝。暮栽黃菊亦成丘。不辭西日射牛背。尙勝北風吹馬頭。新雨客疎塵鎖几。故山秋淡樹藏樓。艱難終竟鄉情耐。準擬行窩處處留。

次韻寄陳達觀少府兼簡叔高

懷人路絕雲歸海。避俗門深草蔽丘。萬事漸消閒客夢。一生虛白少年頭。山蟻叫緩從除架。淮雁來多莫上樓。近日鄰家有新釀。每逢詩伴得淹留。

過清涼寺王參預墓下

江左風流廊廟人。荒墳拋與梵宮鄰。多年羊虎猶眠石。敗壁貂蟬祇貯塵。萬古雲山同白骨。一庭花木自青春。永思陵下猶淒切。廢屋酸風吹野薪。

送僧無等遊華亭

華亭是我曾遊處。記憶端然不作疎。地帶三吳猶壯麗。人經二陸自詩書。輕身羨爾能隨鶴。薄味從來不爲魚。未卜西遊時遠近。道成相問定何如。

送陳彥恂北上兼簡李奇卿學士

天末脩脩起畫舫。離歌清切也堪聽。十年夜雨頭垂白。萬里春風草又青。莫戀皋比專魯席。終須豸角瑞堯庭。平生短李江南傑。今作文昌第幾星。

於杭州九月送袁太初赴寧海教官

憐君跋涉走風沙。九月江城飛雪花。黃蝶終歸穿硯手。青藜曾□聚書家。吟圓坐石題山葉。講退登樓看海槎。年少文游渾好在。何時相伴訪煙霞。

次韻王監簿春前對雪之作

情懷未厭日如年。幻境先看海變田。梁苑貴遊圖畫裏。山陰風致酒尊前。蝦鬚簾濕閒春曉。猊舌香濃凝午煙。肯信高人有高臥。磯頭新泊釣魚船。

陳秀才問詩於余次韻贈之叔壹

秋半說詩秋又闌。覓從忘處更哦看。不妨味熟心自悟。祇恐業成身轉寒。竅木野風天倡和。崩溪怪石鬼鐫刊。扳君更上最高頂。莫羨千金遊子鞍。

次韻荅胡山甫兼簡汪日賓

白髮詩翁南峽居。肯來與子不相疎。久知諸老難折簡。端爲此家多貯書。談吐清無涉俗處。容顏衰似避兵初。溪梁一別還經歲。接得新詩錦不如。

其二

亂後交朋星散居。如君那得易親疎。耐多但有客滿座。忙絕不令兒廢書。萬里山河蓬鬢底。一春風雨杏花初。閒身共遜耽詩老。野服枯藤得自如。

寄袁季厚

莫笑衰顏老剡翁。凶年過徹腹頑窮。坐窗漸愛日南至。行路不愁天北風。清話客多無酒款。白頭交在有書通。聞知別野林泉美。一策一簪吾欲東。

挽舒君實名徽號亦山

玉比清癯鶴比羸。相看中路忽相遺。詩才萬斛難供歎。藥論千箱不起衰。定有意遊輕竹杖。猶餘手剪碎松枝。南山山下徘徊處。曾指佳城示阿宜。

感事

死生契闊強兄弟。南北分張好友朋。戰國幾人成漢鬼。劫灰今日信胡僧。翰林身後詩千首。工部丘前米五升。山路陰寒魚雁絕。舊遊何處寄槭藤。

夢覺

夢覺依然一草寮。浮蹤已慣任飄搖。虛簷晴氣生朝露。遠樹寒聲過夜潮。白骨又驚山下滿。朱顏剛向客中消。時平不愛通侯印。且願深林作老樵。

黎州山下有坡曰響地平黎州自孫興公經始至今有祠其上

蒼茫一片莓苔地。隨意觸來還有聲。定是戰坑餘箭戟。不然琴屋貯瓶罍。名真過客多能記。跡古居人不敢畊。孫叟有靈應索笑。賦成留此試鏐鐸。

寄趙子昂濟南

濟南官府最風流。聞是山東第一州。戶版自多無訟獄。儒冠相應有賓游。秋風魚酒黃梁市。夜月笙歌畫舫舟。行樂使君詩筆俊。一篇肯寄剡溪頭。

陳無逸張仲實皆授徒城中相望遣悶小詩往問

閒身不用苦咨嗟。隨分風流閱歲華。白日垂簾同賣卜。清流岸幘勝趨衙。飛書漆契詩無草。夾註高懸眼未花。更喜芳鄰連二妙。時時衿佩問東家。

蔚講師見示方使君唱酬詩次韻

長汀江上別多時。白髮閒身天所遺。避俗如仇翻好客。知窮爲祟欲耽詩。鄉山雲淡龍移久。湖市春寒鶴下遲。過盡榴梅與甜菊。高侯還許放侯知。

次韻如晦木犀。因寄其從父性之老同舍。

詩力如弓不易張。煩襟且覺對花涼。玲瓏南雪晴秋樹。浙窳西風夜月香。消得玉人歌古淡。許誰金屋鬪清狂。風流更憶同袍老。一塢閒雲傍水鄉。

徐都目之官奉化

小壘飛書定不難。十年清苦舊儒冠。黃簾日轉山衙靜。彩筆春消海驛寒。坂馬易勞須緩騎。潮魚雖美莫多餐。人來肯寄平安不。茅屋三間伴剡灘。

次韻和蔚師鑑師春懷

愁是雲陰喜是晴。春遊何處不關情。黃雞亭館琴三弄。青果杯盤酒數行。滿砌雨添新筍密。隔牆風送落花輕。鑑湖湖上樵山老。破帽枯藜過一生。

次韻王景陽寄軒

江湖猶覺氣橫行。羽褐藤冠學養生。掣肘累輕天與福。欺心戒重鬼司盟。行收耕稼閒勳業。別有吟哦好性情。祇恐蹊成似桃李。人來先識隱居名。

